

Ihiẹn Jizos' Kraịstị Ghosị Jọnu Nghosị

¹ Ihiẹn Jizosị Kraịstị ghosị igbon ẹ wu Jọnu ya rị ime ẹhuhuoni. Osolobue we ihiẹn ndini ye Jizosị, keni o we we ghosị ndi igbon ẹ—ni we hun uzọ marin ihiẹn ndi jenko d'e me ẹgwa. Kraịstị nọ zi mmọn-ozị ẹ jenni odibo ẹ wu Jọnu d'a ghosị a ya, keni o gha ẹka Jọnu ghosị ndi igbon ẹ ya. ² Jọnu a shiaguọ nwan eri banyeni oku Osolobue le ihiẹn Jizos' Kraịstị ku; o shiaguọ eri ihiẹn ile o hun.

³ Ngozi ya rini onye owule k'a gunpuhani ibe ẹ ihiẹn ndi rị ime amumanị; ngozi ya rizikwo ni ndi hun k'a nun'a le ndi hun k'e me ihiẹn we de ime ẹ—makeni ogen ihiẹn ndini e gi me a riguo nsue.

Jonu E Kele Uka Esa Ndi Hu Ri Azuun Eshia

⁴ Jonu de ẹhuhuoni jenni uka esa ndi hu ri Azuun Eshia.

Efoma le udon hun gha ẹka Osolobue, onye ahun ri kikenni, hun ri mbu, hun lalanị bia ya rini onu—efoma le udon hun gha ẹka ya le Mmọn esa hun ri ihun ukpo ẹ ⁵ le Jizos' Kraịstị bia.

Jizosị Kraịstị, hun wu osheri ahun furu we gi e don enya, onye ibuzo gha onwun lihi, onye hun a ki ndi-nze rị elu-ụwa.

Ogho le okiki ya wuru nke Jizosị Kraịstị, onye hun nwe ihiẹn-osisuo enyi, gi edeke ẹ gba puha enyi ẹka njo enyi; ⁶ o nọ nwan me enyi wuru ani-eze, me enyi wuru ndi nchu-ejan Osolobue ẹ hun wu Nedi ẹ. Ogho le okiki ya wuru nke ẹ jennin ejen! Isee.

⁷ Lee ẹ!

O gi orukpu lala;
 ẹnya ile jenkọ d'a hun a—
 ke ndi hu dun a ihien.
 Ndi ani ile ri uwa
 jenko d'a kwan ekwan
 make ufiri ẹ.

Erira k'o jenkọ d'a ri! Isee!

⁸ “Mme wu Ibufọ le Ikpazuun!”

Ya ke Di-nwonna-ẹnyi wu Osolobue ku—onye hu
 hun ri kikenni, hun ri mbu, hun lalani; Onye hun
 nwon iken ile.

Jonu A Hun Jizosi

⁹ Mme wu Jonu nwene unu, hun we ri e gi ifiri
 Kraisti e kpokpo ke we don ri e gi ifiri ẹ e kpokpo
 onu; m wuzikwo onye Ali-eze Kraisti ke unu don wu;
 m wetuzikwo obi ali e din ndidi rike unu.

We dupu m shi ali Patimosi, ali hu mirin
 nohunme, makeni m'e ku oku Osolobue le ni m'a
 shia ni Jizos' eri. ¹⁰ Ogen m gi ri ebahun, o ru
 uhuhin ohu, Uhuhin Di-nwonna-ẹnyi, ebe m ri
 ime mmon, m no nu oken olu ri e ku oku azuun m.
 Olu hu no ke opi ri a hannu. ¹¹ O si, “Detu ihien i ri
 a hun ye ime ehuhuo, y'e zijienni uka esani ya:

uka ri Efesosi,
 uka ri Sumea,
 uka ri Pegamom,
 uka ri Tiatira,
 uka ri Sadisi,
 uka ri Filadefia
 lezi uka ri Laodishia.”

¹² Ya m no gbehuto, ni m hun onye nwe olu ahun
 ri a gwa m oku. E gbehuto m, m no hun obu-ukpe

esa we gi goru memẹ, ¹³ hunzi onye no ke Nwa nke Ihan etintinnai obu-ukpe esani. O yi ewuru tueru ali, gi ihien goru kenhunme obi e. ¹⁴ Isi e le ntutu e hu a chan uchan leke oruru ochan, leke okpukpu mirin-oyi ochan wu s'no. Enya a ebuo hu e nwun ke okun ri e nwunni; ¹⁵ uku-ali a no ke igwe w'a kpo bronzu, hun we finchan ohunma-ohunma, e gbuke noke si we gi okun dunchanpuhanrin unyin ri n'a. Olu e nozi ke uzun oken mirin ri e huni. ¹⁶ O gi kokise esa eka-nni. Opi-a-gha onunai tu nko gha a onu suefuha. Ihun e hu e ti oda-oda ke enya-anwun don e ti efinnai.

¹⁷ Ogen m gi hun a, m no dan ani uku a noke onye nwunni. Kani, o no bu eka-nni e kwasi m, si, "Atule egun. Mmẹ wu Ibuo le Ikpazuun. ¹⁸ Mmẹ wuzi onye hu ri ndun! M te nwunhun anwunhun, kani, lee e, m ri nwan ndun jenin ejen. Mmẹ gizikwo isanhan Onwun le Ali-mmọn."

¹⁹ "Detu nwan ihien i ri a hun—ihien ri ogenni le ihien jenkọ d'e me ihun."

²⁰ "O me nke kokishia esa ahun i hun eka-nni m le obu-ukpe esa hu: kokishia esa hu wu mmọn-ozị esa ndi hu hun a nokin enya uka esa hu. Obu-ukpe esa hu wu uka esa hu."

Isi Nke Ebuo

Ozi Jesu Si We Zi Ndi Uka Ri Efesosi

¹ "Dejenni onye-ozị hun a nokin enya uka ri Efesosi, si a,

Lee ihien onye hu gi kpakpando esa hu eka-nni e, hun e jenhunme ime obu-ukpe esa hu we gi goru memẹ, a hunchanrin ke we no, ku: ² A maringho m

ihien ile onu ri e me: ke unu don ri a gbakemle ke unu don ri e wetu obi ali e dingbu ihien ile. A maringho m ni onu ara ye ndi e me eje-ihien efe; ni onu e leguo ndi hu kpo enwen we ndi-ozu pu-ichen, hun a ni ele we ndi-ozu pu-ichen kaka. ³ A maringhozi m ni unu gi ufiri efan m e wetu obi e dingbu ihien ile, a narin afunfun—bu ndun e k'e gukwonwan unu.

⁴ Kani, onwan wu ihien ri e ze m ize ebe unu ri: unu a latogu ihien-osusu ahun unu nwe isi-ibuzo. ⁵ Nyanhan ni nwan ebe unu te ri ni onu d'a dan, unu e gbewoto, memenzi ihien ndi hu unu te ri e me isi-ibuzo. Unu emen'e, a bia m d'e wepu obukpe unu onodi a—mmani unu bihuto eka.

⁶ Kani, o nwegho ihien ri mma unu ri e me: ihien ndi itu Nkolitia e me, hun e ze mme le enwen m ize, e zezikwo onu nwen ize. ⁷ Onye nwon ntin ya nu ihien Mmon-nsori a gwa uka ri ichen-ichen! Onye hun merini ke m k'e ye iken n'o gi ri mkpuru-osisi ahun e ye ndun, hun ri Paradaisi, Ali Izu-iken Osolobue.”

Ozi Jizosi Si We Zi Ndi Uka Ri Sumena

⁸ “Nke onye-ozu hun a nokin enya uka ri Sumena, dejenn'e, si a,

Lee ihien onye hu wu Ibulozu le Ikpazuun ku, onye ahun te nwunhuni kani o huzi nwan ndun: o si, ⁹ A maringho m afunfun onu ri a ta, marizikwo ke onu mehan ogbenye (kani odafin ke unu wu nke-esi). A maringho m mkpari unu ri a narin eka ndi hun a kpo enwen we ndi Ju, bu ele we ndi Ju, kani ndi ulo-ofufe Ekwensu ke we wu! ¹⁰ Atule ni egun afunfun unu jenkod'a ta. Lee e, Ekwensu e d'a tu ndi hu ime

unu ye unu-ngan keni we gi e lele unu. Unu k'a ta afunfun akp'ohin iri. Kwondon ni okukwe unu d'e ru onwun. Unu kwondon e, e ye m unu ndun—gi e tu unu ugon noke okpu-eze. ¹¹ Onye nwon ntin ya nu ihien Mmon-nsọ ri a gwa uka ri ichen-ichen! Onwun nke ebuo eruko onye hun merini ehụ, o ruo onye hu ehụ.”

Ozi Jesu Si We Zi Ndi Uka Ri Pegamom

¹² “Nke onye-ozị hun a nokin enya uka ri Pegamom, dejenn'e, si a,

Lee ihien onye hu gi o pia-agma onunai hu tu nko ku: ¹³ A maringho m ebe unu bi, ebeku ukpo Ekwensu ri. Bu unu kwondonhukwo efan m. Unu a ghorini, si ni onu ekwerini ni m, ke ogen we gi gbude osheri m we gi e don enya wu Antipasi, hun we gbu ime igunrun onu, ime obodo hu Ekwensu bi.

¹⁴ Kanj, o nwegho ihien ndi ri e ze m ize ebe unu ri: o nwongho ndi ri ime unu ebeku hun e son nkuzi Balam, hun kuzi Balaki ihien o gi bu uke cheni umu Izrelu, me we ri ihien-oriri we gi rua mmon, mezikwo we ghere. ¹⁵ O nwonghozikwo ndi e son nkuzi ndi itu-Nikolitia. ¹⁶ Gbehuto ni nwan. Omeni unu egbehutoji, m k'a bia egwa d'e gi o pia-agma ri m onu luson ndi hu agha. ¹⁷ Onye nwon ntin ya nu ihien Mmon-nsọ ri a gwa uka ri ichen-ichen! Onye hu merini ke m jenkọ d'e yebeye **mana** hu zuerini. M k'e yezikwo a omuma ochan hu we deye efan ohun, efan ohun hun o me ni o nwonni onye marin n'a, wezuka onye hu we ye ya wu omuma.”

Ozi Jizosi Si We Zi Ndi Uka Ri Tiatira

18 “Nke onye-ozì hụn a nọkin ẹn̄ya ụka rị Tiatira, dejenn'e, sị a,

Lee ihien Nwa Osolobue ku, onye ahun ẹn̄ya a e nwun ke okun; onye ahun ukụ-alì a nọ ke igwe bronzu we finchanchanrìn rì e gbukeni: o sị, ¹⁹ A maringhọ m ihien ile unu rì e me—ke ihien-osisuo onu nwe ke okukwe onu ke ozi unu rì e jen ke ihien ile unu wetu obi alì e dingbuchanrìn. A maringhọ m nì ihien unu rì e me kikenni ka ihien unu me isi ibuzo. ²⁰ Kani, onwan wu ihien rì e ze m ize ebe unu rì: unu e ye okpoho hu wu Jezibelu efe, okpoho hu hun a kpo enwen e onye-amuma, hun gi ihien o rì a kuzi e dufie ndi-idibo m, e me we a ghere, e ri ihien-oriri we gi ru mmọn.

²¹ E yeole m'a efe n'o gbehuto, kani o juguo n'o gbehutoko gherebehi. ²² Lee e nwan, m k'a tu a ye bedi emu; m k'e me ndi ya le we gba a ghere ta eje-afunfun—sukpan nì we gbehuto, mebehi eje-ihien ndi hu o rì e me. ²³ M k'e gbu umu a. Uka ile k'e gi e marin nì mme wu onye hu e legha uche le obi onye owule; m k'a kuzikwo onye owule ime unu ugwo-orun furu ihien o rì e me.

²⁴ Kani, nke ndi hoduni ime unu ndi rì Tiatira, hun ghaleni e son nkuzini, hun keleni munrun ihien ndi hu w'a kpo 'Oken ihien-nzuzue Ekwensu,' m sị onu nì ebuyeko m onu ibu ozọ— ²⁵ ka kwonkenme nì ihien unu gi d'e ru nì a bia m. ²⁶ Onye hun merini, hun k'a gha e mesonme uche m d'e ru isi-njendeme, ke m k'e we ndi alì ichen-ichen che okpuru e kima, ²⁷ o k'e gi okpo-igwe kị we,
o k'e tikpochanrìn we
leke ite we gi uru kpu,

28 nọkẹ kẹ Nẹdi m dọn ye m ikẹn m gi a kị. M k'e yezikwọ onyẹ mērini kokisẹ ụtuntun hụ. 29 Onyẹ nwọn ntịn ya nụ ihien Mmọn-nsọ rị a gwa ụka rị ichen-ichen!”

Isi Nke Ètọ

Ozi Jesu Sị Wẹ Zi Ndi Uka Rị Sadisi

1 “Nke onyẹ-ozì hụn a nọkin ẹnya ụka rị Sadisi, dejenn'ẹ, sị a,

Lee ihien onyẹ hụ gi Mmọn ẹsa Osolobue lẹ kokisẹ ẹsa hụ ku: a maringhọ m ihien ile unu rị e mẹ. W'e weri unu kẹ ndi rị ndun, kanị unu a nwunhụngụ! 2 Tẹhin ni nwan, unu e dọzi ihien hodunì, hụn hodụ ẹkẹrẹ n'ọ nwunfu—makeni a hụngụ m'a ni ọrụn ọnu ezuni oke ẹnya Chuku m. 3 Nyanhan ni nwan ihien wẹ kuzi unu lẹ ihien ọnu nụ, unu e gi ẹ dọn, gbehuto. Omẹni unu etenhinni, m k'a bịa nọkẹ ohin, unu amarinkọ oge m'e gi banhan ebe unu rị, kaka!

4 Kanị, o nwegho ndi buleni ọda rị Sadisi hụn keleni ru ẹkwa wẹ unyin. Wẹ jenkọ d'e yiri ẹkwa ọchan, sọn m e jenhunmẹ, makeni wẹ furu efuru.

5 Onyẹ hụn mērini k'e sọn wẹ yiri ẹkwa ọchan. Efichanpukọ m ẹfan onyẹ ahun ime ehuhụo nke ndun, kaka! M k'a nọ id'ẹnya Nẹdi m lẹ ndi mmọn-ozì ẹ kpọ ẹfan onyẹ hụ, ku ẹ ni a maringhọ m onyẹ ọ wu. 6 Onyẹ nwọn ntịn ya nụ ihien Mmọn-nsọ rị a gwa ụka rị ichen-ichen!”

Ozi Jizosì Sị Wẹ Zi Ndi Uka Rị Filadefia

7 “Nke onyẹ-ozì hụn a nọkin ẹnya ụka rị Filadefia, dejenn'ẹ, sị a,

Lee ihien onye hu ri nsọ ku, onye hu wu ihien o si ni ya k'o wu; onye hu gi isanhan Defidi; onye hu we ghaleni a saeka a gunma uzọ o gunpu mọbu gunpu uzọ o gunma: o si,

⁸ A maringho m ihien ile unu ri e me. Lee e, a gunpuguo ni m onu uzọ, hun o me ni o nwonna onye k'a saeka gunman'a. A maringuo m ni onu enwekeni iken bu unu hukwo e me ihien m ku, unu aghorini ni unu a maringho efan m.

⁹ Lee e! M k'e wehe ndi unọ-ofufe Ekwensu hu we si n'o wu Ulo-ofufe ndi Ju, ndi ahun a kpo enwen we ndi Ju bu ntu ro, ele we ndi Ju, a bia we ukw unu d'a kponi unu isi ali, keni we hun uzọ marin ni ihien unu suo m. ¹⁰ Makeni unu e wetuguo obi ali dingbuchanrin ihien ile ke m don gwa unu, aniko m afunfun hun lalan we jenkọ d'e gi lele ndi ile ri ime uwa ru unu ehụ. ¹¹ M lala egwa, kwonkenme ni ihien unu gi, amangbe w'a narin onu okpu eze we k'e gi tu unu ugon. ¹² Onye owule merini ke m k'e gi henrin iden* ime Ulo-nsọ Osolobue m, o ghakozi ebenu pu, kaka! M k'e de efan Osolobue m le efan Jerusalem ohun hu ye e ehụ. Jerusalem ohun hu wu obodo-uku Osolobue m. Ya wu Jerusalem k'a gha enu-igwee le eka Osolobue m hidan; m k'e dezikwo efan ohun m ye onye ahun ehụ ¹³ Onye nwon ntin ya nu ihien Mmon-nsọ ri a gwa uka ri ichen-ichen!"

Ozi Jesu Si We Zi Ndi Uka Ri Laodishia

¹⁴ "Nke onye-ozu hun a nokin enya uka ri Laodishia, dejenn'e, si a,

Lee ihien onye hu wu 'Isee' hun oku Osolobue gha a bun ku—onye ahun wu Osheri we gi e don

* **Isi Nke Eto:12** Pila

ḡnya; Oṣheri ahun wu onye ezioku; Onye hu ihien ile Osolobue ke gha aka bia: o si, ¹⁵ A maringho m ihien ile unu ri e me: unu anuni okun, onu ajuni oyi. K'o ri m, unu a nu okun mobu ju oyi! ¹⁶ Ebe o me nwan ni unu me nan: unu anuni okun, unu ajuni oyi, m'e d'a gha onu m ju pu unu!

¹⁷ Unu ri a si, 'M wu odafin, a baole m uba, o nwonzini ihien a ko ni m.' Kanj, unu a marin n'o nwonni ke o han unu kaka, ni onu e ruguo ihien a gba enya-mirin, ni ogbenye ke onu wu, ni onu wu enya-mpin, ni unu gba oto! ¹⁸ M ri nwan a dun unu odun: nonnarin ni m goru we gwaleni, hun we gi okun dunchanpu unyin ile rin'a, keni unu hun uzo wuru idafin; unu e nonnarinzi m ekwa ochan yiri, gi e kpume oto unu hun e me ifenren, amamgbe w'a hun a; nonnarinzi kwon ni m ogun-nya tuye enya, keni unu leghama uzo.

¹⁹ Ndi m nwe ihien-osusuwo we ke m'a jugbo, uwe ke m'e ye afunfun keni we nwonrin uche. Wepuhakwo ni nwan obi, unu e bihutwo aka. ²⁰ Gon ni ntin! M turu nwan onumuzo, a du aka, onye nu olu m gunfu uzo, a banhan m d'e kunrun e, e son m'e ri, o son m ri. ²¹ M k'e ye onye merini onodi n'o son m nodi elu ukpo-eze m, noke ke mme nwen don meri, son Nedi m nodi elu ukpo-eze e. ²² Onye nwon ntin ya nu ihien Mmon-nsor ri a gwa aka ri ichen-ichen!"

Isi Nke Ẹno

Kẹ W'e Fee Osolobue Ime Elu-igwee

¹ Onwan e meguu, m no lee enya, hun onumuzo we gunpu elu-igwee. Olu hu gwa m oku mbu hun no

ke oken opi no si m, “Bia enu ebeni, ni m ghoṣi i
ihien jenko d'e meni ihien ndini meguu.” ² Ozigbo,
m no ri ime-mmom. M no hun ukpo-eze ime enu-
igwee ebegu, hunzi onye ohu nodi ali elu e! ³ Onye
hun nodi ali ebegu hu e gbuke ke omuma w'a cho
achọ w'a kpo jaspala le hun w'a kpo kaneliani. Ekon-
le-ogugu hun e nwun ke omuma w'a cho achọ wu
emaradi fihunme ukpo-eze hu ohi-ohi. ⁴ Ukpo eno-
kwasi-ogun fihunme ukpo-eze hu ohi-ohi. Ndi-isi
eno-kwasi-ogun nodisonme ukpo ndi hu. We ile
yisonme ewuru ochan, kpusonme okpu-eze goru.

⁵ Amuma hu a gha ukpo-eze hu e bepaha; uzun
mirin ri e deni le akpabo huzi a gha ukpo-eze hu a
hanpaha. Ukpẹ esa ri ihun ukpo hu e nwun—ukpẹ
esani wu Mmon esa Osolobue.

⁶ Ihien rike ohimin we gi ughegbe memeri ihun
ukpo hu; o behu nwanran-nwanran, e nwun zai.

Ihien eno ri ndun enya junsomme ihun le azuun
nahunmezikwo ukpo-eze hu: ⁷ nke ibuzo ri ke
eworo; nke ebuzo ri ke oken-efin; ihun nke eto ri ke
ihun ihian; nke eno ri ke ugon ri e feni. ⁸ Ihien eno
ndini ri ndun nwesonme nku isin-isin. Enya jun we
uzo ile—ke ime we ke azuun we. W'a ra bubehi
ebu—ke uhinhin ke efinnai—ihien we a busonme
wu,

“Nsọ, nsọ, nsọ—ke

Osolobue hun wu Di-nwonna-enyi ri!

Osolobue hun nwon iken ile—

Onye hun ri mbu,

hun ri kikenni,

hun lalani.”

⁹ Ogen owule, ihien eno hu ri ndun gihu yegu
onye hu ri ndun jenin ejen hun nodi ani ukpo hu

oghọ lẹ mgbaye lẹ ekele ẹnina, ¹⁰ ndi-isi ẹnọ-kwasị-
 ọgụn ahun a dan alị ihun Onyẹ hụ nọdị alị elu
 ukpo-eze ahun, Onyẹ rị ndun jẹrin ejen, fe ẹ, tuha
 okpu-eze wẹ ye alị ihun ukpo hụ, a sị,

¹¹ “Chuku-Nna ẹnị!

Y'e furughọ onyẹ wẹ a ja mma—
 y'e furughọ nị w'e ku ẹ ni
 oghọ lẹ mgbaye lẹ ikẹn
 wụ nke i.

Makẹni, iyụ ke ihien ile.

Makẹni y'a choghọ,
 i nọ mẹ wẹ rị;
 makẹni y'a choghọ,
 i nọ ke wẹ.”

Isi Nke Isen

Nwa-ebulu Osolobue Hụ Sụọ Ru Ogo Ihien Ile

¹ M nọ hụn ẹhụhụọ wẹ fifi ma ẹka-nni onyẹ hụ nọdị
 anị enu ukpo-eze hụ. Wẹ dejun ẹhụhụọ hụ ihien,
 kẹ ime ẹ kẹ azuun a, gi eriri ẹsa kẹmẹ ẹ. ² M nọ
 hụnzị mmọn-ozì ohu kin-akwanran k'o gi oken olu
 e yi oro, a sị, “Onyẹ furu hụn k'a tofụ eriri ndi hụ,
 fifipụ ẹkụkwọ hụ?” ³ Kanị, o nwọnni onyẹ ọwụlẹ
 rị elu-igwee mọbụ enu-ụwa mọbụ okpuru-ụwa hụn
 saẹka fifipụ ẹhụhụọ hụ mọbụ lee ẹnya ime ẹ. ⁴ M
 nọ kwanma ẹkwa ọda-ọda, makẹni o nwọnni onyẹ
 wẹ hụn furuni, hụn k'a fifipụ ẹhụhụọ hụ mọbụ lee
 ẹnya ime ẹ. ⁵ Ya kẹ onyẹ ohu ime ndi-isi hụ nọ sị
 m, “Akwanzile! Lee ẹ, Ẹwọrọ ebọn Juda, Mkpogun
 Defidi, e meriguọ—o k'a saẹka tofụ eriri ẹsa ndi hụ,
 fifipụ ẹkụkwọ hụ.”

⁶ Ya m nọ hụn Nwa-ebulu hụn nọkẹ sị wẹ te gbu ẹ egbu k'o turu ẹgbata ukpo-eze hụ lẹ ihien ẹnọ hụ rị ndun lẹ ndi-isi ẹnọ-kwasị-ogun hụ hụn wẹ ile fihunmẹ ya wu ukpo-eze. Nwa-ebuluni nwon mpin ẹsa lẹ ẹnya ẹsa—hụn wu Mmon ẹsa Osolobue, hụn Osolobue zijen elu-uwa ile. ⁷ Nwa-ebulu hụ nọ jẹn d'e weri ẹhuhuo hụ wẹ fifima, hụn rị ẹkanni onye hụn nọdị enu ukpo-eze hụ. ⁸ Ogen o gi weriguu ẹhuhuo hụ, ihien ẹnọ hụ rị ndun lẹ ndi-isi ẹnọ-kwasị-ogun hụ nọ dan alị ihun Nwa-ebulu hụ; onye ọwule ime wẹ gi ubo lẹ aferẹ nsensị wẹ gi goru memẹ hụn nsensị jun ime ẹ. Nsensini wu ekpere ndi nke Osolobue. ⁹ Ya wẹ nọ bu ẹbu ohun, sị,
 “Iyū furu

hụn k'e weri ẹhuhuo hụ,
 hụn k'a topu eriri ndi hụ
 wẹ gi kenmẹ ẹ;

makeni wẹ gbu i,

ị nọ gi ẹdeke i

gbapuhani Osolobue ihian
 ime ebọn ọwule,
 ime asusu ọwule,
 ime alị owule
 lẹ ime ndi ọwule.

¹⁰ Y'e meguo wẹ wuru

alị-eze lẹ ndi nchu-ẹjan
 ebe Osolobue ẹnyi rị;

wẹ k'a ki elu-uwa.”

¹¹ E lezi m ẹnya, m nọ nụ olu ndi mmon-ozu bu ọda hụn fihunmẹ ukpo hụ ohi-ohi lẹ ihien ndi hụ rị ndun lẹ ndi-isi hụ. Ndi mmon-ozini e bukenmeke ọda, wẹ rị nnu-uku ole-lẹ-ole lẹ ijeri ole-lẹ-ole. ¹² Wẹ hụ e gi oken olu a bu ẹbu, a sị,

“Nwa-ebulu hụ wẹ gbu
 e furughọ hụn w'e tuchan,
 nị ikẹn lẹ akụ-lẹ-uba
 lẹ amamihiẹn lẹ akwanran
 lẹ mgbaye lẹ oghọ lẹ ojja-mma
 wụ nke ẹ!”

¹³ M nọ nuzi kẹ ihien ile wẹ ke eke ri a bu ẹbu—
 kẹ hụn ri enu-igwee kẹ hụn ri elu-ụwa kẹ hụn ri
 okpuru ụwa kẹ hụn ri ime ohimin. Ihien wẹ ri a bu
 wụ:

“Ojja-mma lẹ mgbaye
 lẹ oghọ lẹ okiki
 ya wụsonmẹ nke onye hụ
 hụn nọdị anị elu ukpo-eze—
 lẹ Nwa-ebulu hụ—
 jẹrin ejen!”

¹⁴ Ihien ẹnọ hụ ri ndun nọ si, “Ise!” Ndị-isi hụ nọ
 dan ali, fe Nwa-ebulu hụ.

Isi Nke Isin

Nwa-ebulu Hụ A Tọpụ Eri Ndị Hụ

Eri Nke Ibuzo

¹ Ya m nọ hụn kẹ Nwa-ebulu hụ tọpụ eriri ohu
 ime eriri ẹsa ahun wẹ gi kẹnme ẹhuhụọ hụ, m nọ
 nụ kẹ ohu ime ihien ẹnọ hụ ri ndun gi oken olu
 hankenmẹ kẹ akpabọ, si, “Bia!”

² M nọ lee ẹnya, e lee ẹshin ọchan! Onye ri e
 nyinn'ẹ gi ụtaa. Wẹ nọ ye ẹ okpu-eze, ọ nọ nyinrin
 ẹshin ẹ pụ d'e merisonmẹ agha.

Eri Nke Ebuo

³ Ogen Nwa-ebulu gi tọfụ eriri hụn mẹ wẹ ẹbuo,
 m nọ nụ kẹ hụn mẹ ẹbuo ime ihien ẹnọ hụ ri ndun

sị, “Bia!” ⁴ Ya ẹshin ọzọ nọ fūha. Onwan e nwun ufi-ufie. Wẹ nọ ye onye rị e nyinn'ẹ ikẹn n'o wepu udon elu-ụwa, keni ihian gbume ibe wẹ. Wẹ nozi we ọpia-agma hi-ogbe ye ẹ.

Eriri Nke Eto

⁵ Ogen Nwa-ebulu hu gi topu eriri hun me we eto, m nọ nu ke nke eto ime ihien ndi hu ri ndun si, “Bia!” M nọ lee ẹnya, e lee ẹshin ogi! Onye rị e nyinn'ẹ gi ihien we gi a ma ihien. ⁶ M nọ nu ihien nọke olu rị e ku oku k'ọ gha etintinnai ihien ẹnọ hu rị ndun hanpuha, a si, “Ọka jenkọ d'a kogbu enwen ẹ: mkpu oka-witi ẹnọ k'a wude egho-orun akpu-uhuohin! Mkpu oka-bali mmakalaka mmebuo k'a wude egho-orun akp'ohin! Ka e wi-wikwole ofungbon-olivu le manya!”

Eriri Nke Eno

⁷ Ogen Nwa-ebulu hu gi topu eriri nke eno, m nọ nu olu hun me we eno ime ihien ndi hu ri ndun, k'ọ si, “Bia!” ⁸ E lee m ẹnya, e lee ẹshin e nwun ehuhuo-ndun, ehuhuo-ndun, kani o hu e nwun nanhin! Efan onye rị e nyin n'ẹ wu Onwun; Ali-mmọn sọnkọ a. Wẹ nọ kebe ụwa ụzọ eno, ye wẹ ikẹn igi ọpia-agma le unwun le emu le eje-anu ndi rị elu ụwa gbupu ụzọ ohu rin'a.

Eriri Nke Isen

⁹ Ogen Nwa-ebulu hu gi topu eriri nke isen, m nọ lee ẹnya okpuru ukpo nchu-ẹjan, m nọ hun ume-ndun ndi hun we gbu make oku Osolobue le eri we shiani Jizosi. ¹⁰ Wẹ nọ weshi olu wẹ enu, e yi, “Euu Di-nwonni-ẹnyi, Onye hun ihien ile rị ẹka a, onye rị nsọ, onye ezioku! Nani ke y'e biehan d'e kin ndi rị enu-ụwa ikpe, gbugwari wẹ ke wẹ don gbu ẹnyi?”

11 Ya wẹ nọ ye onye-onye ime wẹ ewuru ochan tueni, si wẹ zuzi iken ekere ni umune wẹ le ndi-idibo ibe wẹ zuguu onu, ndi ahun ihian k'e gbu ke wẹ don gbu wẹ.

Eriri nke Isin

12 Ogen Nwa-ebulu hu gi tofu eriri nke isin, ali no mahihie o-da-o-da, anwun no gime ngi ke ekwa-ogi, ifon hun shiaguni no nwunhuto, nwunme edeke-edeke. 13 Kokishia no gha elu-igwere danyesonme ani—noke ebe oken ufere no nutusonme ogbe figi chanleni. 14 Igwere no fori noke ebe wẹ no fifima ehuhuo, wepu. Wẹ no wepu ugu ile le ali ile mirin nohunme onodi wẹ. 15 Ya ndi-nze uwa le ndi uku le ndi-ndu-agma uku, le ndi idafin, le ndi ile wẹ gi oku wẹ e don le ndi ozọ ile—ke igbon ke ndi nwe enwen wẹ—no shisonme ime okporo le ebe omuma risonme elu ugu d'a wari, 16 a si ugu le omuma ndi hu, “Dodo ni, dankwasị ni enyi! Ni unu zueme enyi make Onye hun nodi elu ukpo-eze hu gha e legha enyi; make onuma Nwa-ebulu hu ghazikwo e kunrun enyi— 17 make ni oken uhuhin wẹ gi a kpo onuma a biaguo! Onye wu nwan onye ahun jenko d'a sa eka wuzo!”

Isi Nke Ẹsa

Madu Nnu Ogun-mmesato Hu

1 Onwan e meguu, m no hun mmọn-ozị eno ke wẹ turusonme ebamin eno uwa. Wẹ turusonme ebegu e gbondon ufere eno hun e fe ime uwa, amangbe ufere e fezi uwa mobu ohimin mobu osisi owule. 2 Ya m no hun mmọn-ozị ozọ k'o gha azuun owuwa-anya-anwun puha, shiko elu; o gi ihien Osolobue ri

ndun gi e ye ahima. O no gi oken olu gwa mmṛon-ozì eno hu we ye iken ni we gi wiwi uwa le ohimin oku, ³ si we, “Ekewiwile ni uwa mṛbu ohimin mṛbu osisi owule; cheri ni ni enyi yegu ndi idibo Osolobue enyi ahima ezimezi-ihun we.” ⁴ M no nwan nu madu ole we ye ahima ahun. Madu nnu ogun-mmṛsatṛ ke we ye ahima hu ime ikpun-ulo ile ri Izrelu:

⁵ nnu iri-kwasì-ogun wu ndi ikpun-ulo Juda;
 nnu iri-kwasì-ogun wu ndi ikpun-ulo Rubeni;
 nnu iri-kwasì-ogun wu ndi ikpun-ulo Gadi;

⁶ nnu iri-kwasì-ogun wu ndi ikpun-ulo Asha;
 nnu iri-kwasì-ogun wu ndi ikpun-ulo Naf'tali;
 nnu iri-kwasì-ogun wu ndi ikpun-ulo Manase;

⁷ nnu iri-kwasì-ogun wu ndi ikpun-ulo Simionu;
 nnu iri-kwasì-ogun wu ndi ikpun-ulo Livai;
 nnu iri-kwasì-ogun wu ndi ikpun-ulo Isaka;

⁸ nnu iri-kwasì-ogun wu ndi ikpun-ulo Zebulun;
 nnu iri-kwasì-ogun wu ndi ikpun-ulo Josefù;
 nnu iri-kwasì-ogun wu ndi ikpun-ulo Benjamini.

Igunrun Ihian Gha Ali Ile Ri Ichen-ichen Puhà

⁹ Onwan e meguu, m no lee enya, hun igunrun hi-ogbe, hun o me ni o nwṛnni onye saeka gun we. We gha ali ile, ebon ile, ndi ile, le asusu ile puha. Igunrunni turu ihun ukpo-eze hu le ihun Nwa-ebulu hu. We yisonme ewuru ochan tueru ani. Onye-onye ime we gisonme iguru aka. ¹⁰ We hu e gi oken olu e yi oro, a si,

“Nzuofuha gha aka Chuku enyi
 hun nodi enu ukpo-eze
 le Nwa-ebulu hu a bia”

11 Ndi mmon-ozì ile turusonme ebèhù, fihunme ukpo hù lẹ ndi-isi hù lẹ ihien eno hù rì ndun; wẹ nọ dan alì ihun ukpo hù, ke isi alì, fe Osolobue, ¹² a bu ebuni:

“Isee!

Ija-mma lẹ ogho

lẹ amamihiẹn lẹ ekele

lẹ mgbaye lẹ iken lẹ akwanran

wù nke Chuku enyi

jenrin ejen! Isee!”

13 Ya onye ohu ime ndi-isi hù nọ sị m, “Elee ndi wù ndini yi ekwa ochan tueru alì? Elebe ke wẹ gha bia?” ¹⁴ M nọ sị a, “Di-okpa, iyu marin ndi wẹ wù.” Ya o nọ sị m, “Ndi wù ndi hun gha oken ukpokpo hù puha. E giguọ wẹ edeke Nwa-ebulu hù sù ewuru wẹ, ewuru wẹ e henrisonme nke ochan. ¹⁵ Ya hain wẹ gi nwan rì ihun ukpo Osolobue e fe e uhinhin lẹ efinnai ime Ulo-nsọ a. Osolobue, Onye hun nodi ani elu ukpo-eze, k'a noyeni wẹ, chedon wẹ. ¹⁶ Egun ihien-oriri lẹ ihien-orira agunkozi wẹ. Anwun mobu ihien owule a hun okun amakozi wẹ. ¹⁷ Makeni Nwa-ebulu hù hun rì etintinnai* ebèhù ukpo hù rì k'a wuru onye-ndu wẹ; o k'e du wẹ noke onye e du anu, shi isi-mirin ndi hù mirin e ye ndun gha a bia. Chuku jenkọ d'e finchanpu enya mirin owule rì wẹ enya.”

Isi Nke Ẹsato

Eriri Nke Ẹsa Hù Lẹ Opi Ẹsa

* **Isi Nke Ẹsa:17** Lee 5.6

¹ Oge Nwa-ebulu hụ gi topu eriri nke ęsa, elu-igwee ile nọ me juu ihien nọke nkirishi mg-bahunme okuloku ohu. ² Ya m nọ hun ndi mmọn-ozu ęsa hụ hun e turu ihun Osolobue. We nọ ye we opi ęsa. ³ Mmọn-ozu ozo, hun gi mkpu goru w'a kpo Sęsa we gi a dunni Osolobue nsęsi okun, nọ bia d'e turu ihun ukpo nchue-ęjan hụ. We nọ kponye e nsęsi oda-oda, n'o gi ya le ekpere ndi-nsọ ile e me chu ęjan elu ukpo nchue-ęjan hụ we gi goru memę hun ri ihun ukpo-eze hụ. ⁴ Enwunrun nsęsi hụ ri a dunni le ekpere ndi-nsọ hụ nọ gha ęka mmọn-ozu hụ a loshi elu ihun Osolobue. ⁵ Ya mmọn-ozu hụ nọ weri Sęsa hụ we gi a dun nsęsi okun, gi okun ri ukpo nchue-ęjan hụ hujun e, tu a ye enu-ęwa. Ya ke akpabo nọ han, mirin e den, amuma e be, ali a mahihie.

Opi Eno Ibuzo

⁶ Ebehu ke ndi mmọn-ozu ęsa hụ gi opi ęsa nọ kwademę ni we gbu opi we.

Opi Ibuzo

⁷ Mmọn-ozu nke ibuzo nọ gbu opi e, ekwan-igwee le okun we gwogbama ya le edeke nọ puha. We nọ ma we ye ime ęwa, o nọ dunpu ęzo ohu okun, nato ęzo ebuo; ime osisi ile, o dunpuzi ęzo ohu, o hodu ęzo ebuo; o dunpuchanrinzi efifia-ndun ile.

Opi Nke Ebuo

⁸ Mmọn-ozu nke ebuo nọ gbu opi e, we nọ tu ihien nọke ęregede ugu ri a nwun okun ye ime ohimin—azuun ohu nọ henrin edeke, o hodu azuun ebuo. ⁹ Uzo ohu ime ihien ndi ri ndun ri ime ohimin nọ nwunhun, o hodu ęzo ebuo. Imę ugbo-mirin ile, ęzo ohu nọ tikpofu, o hodu ęzo ebuo.

Opi Nke Eto

¹⁰ Mmọn-ozì nke ẹto nọ gbu opi ẹ: kokise ohu hi-ogbe rì e nwun okun lẹkẹ ọwa nọ gha igwere dan. Ime iyi ile rì ọwa, ọ danye ọzọ ohu natọ ọzọ ẹbuo—uwe lẹ isi-mirin rì ichen-ichen k'ọ danye. ¹¹ Efan kokise hu wu “Elumilu.” Ime mirin ile rini, ọzọ ohu nọ lume ilu, ọ hodu ọzọ ẹbuo. Ndi bu ọda nọ nwunhun, make ni mirin hu rì e lu ilu.

Opi Nke Eno

¹² Mmọn-ozì nke eno e gbu opi ẹ, ihien nọ fian enya-anwun azuun ohu, fianzikwo ifon lẹ kokise azuun ohu-ohu, latosonme we azuun ẹbuo-ẹbuo. Ukpẹ we nọ belu: we kebe ke we e nwunhan mbu ọzọ ẹto, enwunkarizini we ọzọ ẹbuo. Anwun amuchanrinzini ke uhuhin han k'o don a mu mbu; ifon etibiehanzini k'o don e ti mbu. We kebe uhuhin ọzọ ẹto, anwun amukarizini ọzọ ẹbuo—erirazikwo ke ifon me uhinhin. ¹³ M nọ lee enya enu, hun ugọn ohu k'o feko ime elu, yiko, “Nsongbu! Nsongbu! Oken nsongbu jenkọ d'a rini ndi ile bi elu-ọwa oge ni ndi mmọn-ozì ẹto hu k'e gi nwan gbusonme opi ẹto hun hoduni!”

Isi Nke Itenei

Opi Eto Hoduni Lẹ Eje-mgbugbu Ahun

¹ Mmọn-ozì **nke ise** n e gbu opi ẹ, m nọ hun kokise ohu hun gha elu-igwee danye ọwa. We nọ ye ẹ isanhan oken-mgbugbu hu migbu enwen ẹ.

² Ọ nọ gunpu eje-mgbugbu hu migbu enwen ẹ, enwunrun nọ gha ebegu lopuhama ke enwunrun oken okun we gi a dunchanpu unyin rì goru. Enya-anwun lẹ ufere nọ gba ishi make ufiri enwunrun

okun hụ gha ebèhụ a lofuhà. ³ Ya igurube nọ gha ime enwunrùn hụ pùhama, berisonme enu-ùwa. Wẹ nọ ye wẹ ikèn, ụdị ikèn hụ akpị rị elu-ùwa nwe. ⁴ Wẹ nọ sị wẹ egbulẹ efifia rị enu-ùwa mọbụ ihien owulẹ e nwun ehuhuo-ndun ehuhuo-ndun rị e sue ime ugbo mọbụ ime ofia mọbụ osisi owulẹ, ka wẹ ru ndị hụ nwonlèni ahịma Osolobue ezimezi-ihun wẹ ehụ, uwe sọ. ⁵ Wẹ nọ ye igurube ndị hụ efe nị wẹ ye ndị hụ ezigbo afunfun, orogbo ifon isen—kanị aninị wẹ wẹ gbu ndị hụ. Ụfụ wẹ nọkẹ ebe akpị nọ gba ihian. ⁶ Ogèn ihienni e gi mẹ, ihian k'a chọ onwun, ahunko wẹ onwun; wẹ jenkọ d'a chọkenmẹ nị wẹ nwun, kanị, onwun k'a gba nị wẹ osọ.

⁷ Igurube ndị hụ rị kẹ eshin wẹ kwademeguu wẹ k'e gi jèn agha. Ihien nọ kẹ okpu-eze goru risonmẹ wẹ isi. Ihun wẹ nọ kẹ nke ihian. ⁸ Enenren wẹ sue kẹ ntutu ikpoho. Eze rị wẹ onụ nọ kẹ nke eworo. ⁹ Okpukpu rị wẹ ehụ rị kẹ igwe onye-agma gi e gbondon obi; nku wẹ hụ a zun uzun kẹ ebe eshin dokpunko ugbo-agma bu oda gbabanko ogbo agha. ¹⁰ Wẹ nwezonmẹ odundun. Edide w'a gba ihian risonmẹ wẹ odundun—ọ nọ kẹ edide akpị. Odundun wẹ kẹ ikèn wẹ gi e ye ihian afunfun orogbo ifon isen rị.

¹¹ Eze a kị igurube ndinị wẹ wụ mmọn-ozì okèn-mgbugbu hụ migbu enwen ẹ. Ndị Hibru a kpọ mmọn-ozini Abadonụ; ndị Griki a kpọ a Apoliọnu: *efan ebuonị wụ “Onye-ntikpo.”*

¹² Nsongbu nke ibuzọ a ghafeguo, ebuo lalazi.

E Gbupu Wẹ Uzo Ohu Ime Ndị Rị Elu-ùwa Lato Uzo Ebuo

¹³ **Mmọn**-ozì **nke isin** nọ gbu opi ẹ, m nọ nụ ke olu gha mpin ẹnọ rị ntin ẹnọ ukpo nchụ-ẹjan goru hụ rị ihun Osolobue a hanpuha. ¹⁴ Olu hụ nọ sị mmọn-ozì nke isin hụn gi opi, “Tọpụ mmọn-ozì ẹnọ hụ wẹ kẹnmẹtọ oken iyi Yufretisi!” ¹⁵ Ya wẹ nọ nwan tọpụ mmọn-ozì ẹnọ hụ, hụn wẹ kwademeguu, kẹnmẹ wẹ tọ, e che ogenni, uhuohinni, ifonni le ahuanị; wẹ nọ nwan tọpụ wẹ keni wẹ gbupu ụzọ ohu ime ihian ile rị elu-ụwa, gbuhodu ụzọ ẹbuo. ¹⁶ Ndi-agma hụn nyiko eshin nọ puha, wẹ wụ ijeri-ohun ogun-iri (ya wụ nnu-iri, nnu-iri ụzọ nnu isen-kwasị-ogun-isin). A nughọ m ole wẹ rị.

¹⁷ Lee ke m don hụn eshin ndi hụ ime ohun m: ndi rị e nyin ni wẹ yisonme ihien igwe wẹ gi e gbondon obi wẹ. Ihien igwe ndini e nwun ufie-ufie leke okun, enwunrun-enwunrun leke Safe, lezi unwanran-unwanran leke nsin-nya-anwun wụ sofo. Isi eshin ndi hụ rị ke nke eworo. Okun le enwunrun le nsin-nya-anwun wụ sofo ghazi wẹ onu a puha. ¹⁸ Wẹ nọ gi eje-ihien eto ndi hụ rị a gha eshin ndi hụ onu a fua—ya wụ okun le enwunrun le nsin-nya-anwun wụ sofo—gbufu ụzọ ohu ime ihian ile rị elu-ụwa, gbuhodu ụzọ ẹbuo, ¹⁹ make ni onu eshin ndi ahun le odundun wẹ ke iken eshin ndi hụ risonme. Odundun wẹ nosonme ke agwo, nwonsonme isi ke agwo. Isi ndi hụ risonme wẹ odundun ke wẹ gi a ru ihian ehụ. ²⁰ Ndi hụ hodu elu ụwa—ndi hụ eje-ihien ndini gbuleni—egbehutonị obi mebehi eje-ihien wẹ rị e me; alatoni wẹ ife eje-mmọn le ifesonme mmọn wẹ gi ẹka memẹ—ke nke goru ke nke ona wụ siva ke nke igwe bronzu ke nke omuma ke hụn wẹ gi osisi pin—mmọn ghaleni e ri-eka e legha ụzọ mọbu

a nū ihien mōbu e jēn ijen! ²¹ Egbehutozīkwōnī wē mēbehi njo ndinī wē e mē: igbu-ochū, irūa-mmōn, ibu-nshi lē igi ikēn eje-mmōn a rūn, ughere, izu-ohin.

Isi Nke Iri

Mmōn ozi Hū Gi Ehuhuo Wē Fifiṣu

¹ Ya m nō hūn mmōn-ozī ozo kin-akwanran k'o gha elu-igwee hidanla. Orukpu fuhunmē ē; ekōn-lē-ogugu rī ibe isi ē, ya nwēn rī a okpuru; ihun ē nō kē enya-anwūn. Ūkū a rī kē polu ēbuo wē gi okun mēmē*. ² O gi ehuhuo mē ekere wē fifiṣu ēka a. O nō bu ūkū ēka-nni ē che elu ohimin, bu ūkū ēka-ekpēn ē to akpakali. ³ O nō gi okēn olu, hūn nō kē nke eworo rī e dēnni, yi oro. Ogeṅ o gi yi oro, akpabo esa ahun nō han. ⁴ Ogeṅ akpabo esa ahun gi hangū, m te cho nī m demē, kanī a nū m olu gha elu-igwee sī, “Zueme ihien akpabo esa hū ku, edetule ē!”

⁵ Ya mmōn-ozī hū m hūn k'o turu elu ohimin lē akpakali nō weshi ēka-nni ē enu zime enu-igwee, ⁶ kun efan Onye hū rī ndūn jēnrin ejēn, hūn ke elu-igwee lē ihien ile rīn'a, ūwa lē ihien ile rīn'a lē ohimin lē ihien ile rīn'a, sī, “Ebiekozi wē, kaka! ⁷ Kama, hūn **mmōn**-ozī **nke** esa gihū gbu opi ē, ihien ahun mini Osolobue kwademe e mezuchanrīn k'o don gwa ndi idibo ē ndi-amuma.”

⁸ Ya olu hū gha elu-igwee gwa m oku nō sizi m, “Jēn d'e weri ehuhuo hū fifiṣunī hūn rī ēka mmōn-ozī hū ūkū a ohu rī elu ohimin, ūkū a ohu hū akpakali.” ⁹ Ya m nō jēn d'e kunrun mmōn-ozī hū, sī a ye m ehuhuo hū mē ekere. O nō sī m, “Weri ē rī.

* **Isi Nke Iri:1** pila ēbuo wē gi okun mēmē

Ọ k'a sụọ ì ụsụọ ọny nọkẹ mirin-ẹnwun, kanị, o k'e lu i ilu ẹfọ." ¹⁰ Ya m nọ narin mmon-ozì hụ ẹhụhụọ hụ mẹ ẹkẹrẹ ri, ọ nọ sụọ m ụsụọ ọny nọkẹ mirin-ẹnwun, kanị, oge m gi rigụ a, ẹfọ nọ lumẹ m ilu. ¹¹ Ya wẹ nọzi sị m, "I k'e buzi amuma banyeni ndi bu ọda, anị bu ọda, ndi asusu ichen-ichen bu ọda le ndi-nze bu ọda."

Isi Nke Mmanaj

Ndi Osheri Ebuo Hu

¹ Ya wẹ nọ ye m mkpịnsin wẹ gi a ma ihien. Mkpịnsin hụ nọ kẹ ọkpọ. Wẹ nọ sị m, "Bia d'a ma Unọ-nso Osolobue le ukpo nchụ-ẹjan, y'a gunzikwo ndi hun ri ebẹhụ e fe ofufe. ² Ka amale ihun-ezi Ulo-nso, hapu ohun—makeni e weguo w'a ye ndi ali ndi ozọ ri ichen-ichen. Wẹ k'a zọ obodo nso hụ ukụ ọrogbo ifon ebuo kwasi ogunnaị."

³ "M k'e ye ndi-osheri m ebuo iken bu-amuma, ku oku-Chuku, ọrogbo akpu-uhuohin ogun eto kwasi nnu eto (ogun mmeto kwasi nnu-uku), wẹ k'e yisonme ekwa ahio." ⁴ Ndi osherini wu osisi olivu ebuo le obu-ukpe ebuo hụ ri ihun Onye-nwon-uwale. ⁵ Omeni ihian cho n'ọ mẹ wẹ ihien owule, okun a gha wẹ ọny puha, dungbu ndi inenren wẹ ahun cho ni wẹ mẹ wẹ ihien; erira kẹ onye owule cho n'ọ mẹ wẹ ihien owule k'a don nwun. ⁶ Wẹ nwon iken wẹ gi a kpokin enu-igwere amamgbe mirin e zue oge hụ ile wẹ gi e bu amuma, e ku oku Chuku. Wẹ nwonzikwo iken wẹ gi e mẹ mirin e henrin edeke—kẹ mirin ri iyi kẹ hun ri ohimin, wẹ nwonzikwo iken wẹ e gi mẹ udi eje-nsongbu le afunfun owule biani uwa oge owule wẹ cho.

⁷ Wẹ shiaguu ẹri wẹ, eje-anu hu hun k'a gha eje-mgbugbu hu migbu enwen e puha k'a lusun wẹ agha, meri wẹ, gbu wẹ. ⁸ Ozun wẹ k'a ri uzọ uwaya kanị ri obodo uku hu wẹ gi enya ime mmọn a kpọ Sodomu lẹ Ijiptu, obodo ohu hu wẹ nọ kpogbu Dinwọnni-wẹ. ⁹ Orogbo akp'ohin eto lẹ mkpikpi, ndi ri ichen-ichen lẹ ndi ebon lẹ asusu lẹ alị risonme elu uwa k'a gba ozun wẹ ilee; aniko wẹ onye owule li wẹ. ¹⁰ Ndi bi uwa k'a ri a ghoghọ ni madu ebuo hu a nwunhun, e me mmemme, e yetari ibe wẹ ihien —makeni ndi-amuma ebunoni te bu afunfun toni ndi ile ri elu-uwa.

¹¹ Kanị, oge o gi mefu akp'ohin eto lẹ mkpikpi, ufere hun e ye ndun nọ gha ebe Osolobue ri bia, banye ime wẹ, wẹ nọ turu oto—oken egun nọ bia ndi hunni wẹ. ¹² Ya wẹ nọ nu oken olu gha elu-igwee si wẹ, “Bia ni elu ebeni!” Ya wẹ nọ gi orukpu shi enu-igwee, id'enya ndi-inenren wẹ ri e lee wẹ ile. ¹³ Ozigbo, alị nọ mahihie oda-oda, azuun ohu ime obodo hu nọ tikpo, o hodu azuun itenei. Alị hu mahihieni gbu madu ogun-iri kwasị nnu-mmesa (madu nnu-uku esa). Egun nọ tikenme ndi hoduni, wẹ nọ kweri ni Osolobue hun ri elu-igwee e hike ogbe.

¹⁴ Nsongbu nke ebuo a ghafeguọ, lee e, nke eto lala egwa.

Opi Nke Esa

¹⁵ Ya mmọn-ozu nke esa nọ gbu opi e, m nọ nu oken olu risonme elu-igwee, a si,
 “Alị-eze uwa a wuruole nke Di-nwọnni-enyi
 lẹ nke Kraisti a hun o tume;
 o k'a ki jenrin ejen!”

16 Ya kẹ ndị-isi ẹnọ kwasi ọgụn hụ hụn nọdịsonmẹ ukpo wẹ ihun Osolobue nọ dan anị, keni Osolobue isi-alị, fe e, ¹⁷ a bu ebunị:

“Enyi rị e ye i ekele,

Chuku Nna,

hụn nwọn ikẹn o gi e mẹ ihien ile,

onye hụn rị kikenni, hụn rịzikwo mbu.

Makeni y'e giguọ ikẹn i hi-ogbe kịma.

¹⁸ Ndi alị ile e te bughọ olulu;

kani iwe-le-ọnuma i

a biaọle nwan.

Ogen y'e gi kin ndi nwunni ikpe

e ruguọ.

Ogen hụn y'e gi kụ ndi-idibo i ugwo,

e ruguọ nwan—

ndi idibo i ndi-amuma—

uwe le ndi-nsọ

le ndi a tu egun i—

ke ndi uku ke ndi nta.

Ogen y'e gi tikpo ndi hụn e tikpo uwa

e ruguozị!”

¹⁹ Ya wẹ nọ gụnpụ Ulo-nsọ ime enu-igwee, wẹ nọ hụn Ekpeti-nkwerigbama Osolobue ime ebẹhụ. Amuma elu-igwee nọ besonmẹ, mirin nọ densonmẹ, akpabọ nọ hansonmẹ; alị nọ mahihie, ekwan igwere nọ dan ọda-ọda.

Isi Nke Mmèbụọ

Okpoho Hụ Lẹ Dragonu

¹ Ya kẹ oken ahunlele pu-ichen nọ puha elu-igwee: okpoho yi enya-anwun ke ewuru nọ fuha; ifon rị a okpuru uku, okpu-eze kokise mmèbụọ rị rị a isi. ² O

rị ime. O hụ a kwan ekwan makeni ime rị e me e. O hụ a turu a oda-oda makeni omumu e ruguo a.

³ Ahunlele ozọ nọ mezi ime enu-igwee: eje-anu hi-ogbe w'a kpọ dragon' a puha; Dragonu e hike ogbe; o nwun ufi-ufie. Isi esa le mpin iri k'o nwe. Okpu-eze ohu-ohu, risonme e isi esa ndi hu.

⁴ Odundun a nọ zari uzọ ohu ime kokise rị elu-igwere, tu we ye ani—o hodu uzọ ebuo. Dragonu hu nọ turu ihun okpoho hu rị a cho n'ọ mu nwa, keni o ripu nwa a hun o gihu mupuha a.

⁵ Okpoho hu nọ mu nwa, nwata-okennyẹ, hun jenkọ d'e gi okpo-igwe ki ndi ani ile. Kani, hun o gihu mupuha nwata-okennyẹ hu, we nọ juru ya wu nwata, we e shi ebe Osolobue le ukpo-eze Osolobue rị. ⁶ Ya okpoho hu nọ gbashi ime atu d'a nodi ebefu Osolobue kwademe n'e, ebe we k'a nọ lepu a enya akp'ohin ogun-etọ kwasi nnu-etọ.

⁷ Ya we nọ luma agha elu-igwee, mmọn-ozu wu Maikelu le ndi mmọn-ozu e son n'e nọ luson Dragonu hu agha. Dragonu le ndi mmọn-ozu e nọ lusongwari we. ⁸ Kani we nọ meri Dragonu hu. Anizi ni we ya le ndi mmọn-ozu e nodi enu-igwee. ⁹ We nọ tutu Dragonu uku hu, agwo mbu-mbu hu w'a kpọ Ekwensu, a kpozị a Setani. Iya wu onye hun e dufie uwa ile. We nọ tutu e ye elu-uwā—iya le ndi mmọn-ozu e.

¹⁰ M nọ nwan nu olu ohu hannị ime elu-igwee, hun rị a si,

“Nzuofuha le iken le ali-eze Chuku enyi
le okiki Kraisti, onye hu o tume,
a biaguo nwan.

Makeni a tutuguo we onye ahun,
hun e kpesonme umune enyi,

ndị Itu-Kraịstị ibe enyi
 ẹka Osolobue enyi uhinhin le efinnai.

¹¹ Kani we no gi edeke Nwa-ebulu hu le oku we gi shian'a eri meri e; egheni we isi tuhu okukwe we.

¹² Ya wu, enu-igwee ya ghoghoma nwan;
 iya le ndi bi ime e!

Kani, nsongbu jenkọ d'a rini uwa le ohimin,
 makeni Ekwensu e hidanguo d'e kunrun onu.

O gi oken olulu bia—

makeni o maringuo ni ogen e hodu ekere!”

Ekwensu E Buhezi Nsongbu E Elu-uwaa

¹³ Ogen Dragonu hu gi hun ni a tutuguo w'a ye elu-uwaa, o no chuma okpoho hu mu nwata-okennyeh hu.

¹⁴ Kani, we no ye okpoho hu nku ebuo, nku ugon uku—n'o gi gha ebe agwo hu ri fepu, shi ime atu, ebe we jenkọ d'a no lepua a enya [ihien noker]

ahua eto le ifon isin. ¹⁵ Ya agwo hu, dragonu hu, no gha onu a hupuha mirin no ke iyi, n'o hukpu okpoho ahun, keni o huru e,

¹⁶ kani ali no yeni okpoho hu aka: ali no shiapu onu, luefu mirin hu Dragonu hu gha onu hupuha.

¹⁷ Ya ize okpoho hu no ban Dragonu hu, o no pu, jenme d'a luson umu okpoho hu agha, ya wu umu a ndi hoduni;

ndi hun e mesonme ihien ndi hu Osolobue ku; ndi hun a shia ni Jesu eri; ndi hun e kwonkenme oku Jesu.

¹⁸ Dragonu hu no turu enu ejan ri mkpenren ohimin.

Isi Nke Mmepo

Eje-anu Ebuo Hu

¹ M no hun eje-anu ohu k'o gha ime ohimin pula. Mpin iri le isi esa k'o nwe. Okpu-eze ohu-ohu

rişonme elu mpin ndi hu. Efan ri ichen-ichen e kuto Osolobue rişonme elu isi esa hu. ² Eje-anuni m hun no ke Ubidon. Uku ali a no ke nke eje-anu w'a kpo Bie. Onu a no ke nke Eworo.

Ya Dragon' no we iken e le ukpo-eze e ye eje-anu hu, tume e oken onye-okiki. ³ Isi eje-anu ahun ohu no ke isi anu we gbuguu, kan ebeku we gi gbu e a lagu. Ihen ri eje-anuni eh u tukenmeka uwa ile enya—nke wu ni we ile hu e son e. ⁴ We ile no fema Dragonu hu makeni iya ye eje-anu hu iken ahun o gi ki okiki. We nozi fe eje-anu hu, a si, “Onye no ke eje-anu hu? Onye k'a saeka luson e ogun?”

⁵ We ye eje-anu hu onu o gi a nyan isi, e kusonme aru. We no ye e oghere kpa iken orogbo ifon ebuo kwasi ogunna. ⁶ O no shiapu onu kutosonme Osolobue, e kuto efan a, e kuto ebe o bi—ya wu, e kuto ndi ile bi elu-igwee. ⁷ We nozi ni a luson ndinsogha, meri we; e wezikwo we ebon ile le ndi ile le asusu ile le ani ile che okpuru e kima. ⁸ Ndi ile bi enu-uwa k'e fe e—ya wu onye owule we deleni efan a ime ekukwo nke ndun Nwa-ebulu hu we gbu ni we d'e gbe iyeto uwa.

⁹ Onye nwon ntin, ya n'o nu.

¹⁰ Onye owule Osolobue si ni we k'a nwunrun a, we k'a nwunrun a; onye owule Osolobue si ni we k'e gi opia-agma gbu e, we k'e gi opia-agma gbu e.

Onwan cho ndidi le okukwe aka ndi nke Osolobue.

¹¹ Ya m no hun eje-anu ozo hun gha ime-uwa pula. Mpin ebuo k'o nwe rike nwa-ebulu bu o ku ke Dragonu.

12 Okikì Eje-anụ hụnnì rì a kị wụ nke eje-anụ nke ibuzọ, hụn o ye ẹ kịdọnn'ẹ. Ọ wa a ye ụwa lẹ ndị hụn bi ime e olu nì wẹ e fe eje-anụ nke ibuzọ hụ—hụn ebe wẹ gi gbu ẹ lagu. 13 Ọ gisonmẹ oken ọrụn-atumènya a kpa ikèn; o mèghodẹ okun gha elu-igwee hidan id'ènya ihian ile. 14 Ọ nọ gi ọrụn-atumènya ndinì wẹ ye ẹ efe rụndonni eje-anụ nke ibuzọ hụ dufie ndi bi elu-ụwa; ọ sị wẹ kpụ ya wụ eje-anụ nke ibuzọ—hụn ahun wẹ be opia-agma isi ohu gbu ẹ—kanì ọ huzi nwan ndun. 15 Wẹ nọ nizi eje-anụ hụn-ẹboni saeka mẹ ihien o mẹ hūn ihien ahun wẹ kpụ gi rì ndun, kunmẹ umenren—ihien hū wẹ gi ụdi eje-anụ nke ibuzọ hū kpụ, nke wū nì ya wū ihien wẹ kpụ nọdẹ kumẹ oku; ya wū ihien nọdẹ mẹ wẹ gbu ndi hū ile jū nì efeko w'a.

16 Eje-anụ hūn-ẹboni nozi mẹ wẹ ye ihian ile ahima ẹka-nni mọbụ ezimezi-ihun—kẹ ndi uku kẹ ndi nta, kẹ odafin kẹ ogbenye, kẹ igbon kẹ onye nwon enwen ẹ— 17 nke wū nì onye ọwule wẹ yeleni ahima hū a saeka non mọbụ re ihien ọwule. Ahima hū wū ẹfan eje-anụ ibuzọ hū mọbụ ahima hūn a nokin enya ẹfan a.

18 Onwan cho amamihien: onye ọwule nwon nghota ya gi ẹ gbako ahima eje-anụ hū, makeni ahima ihian ro. Ahima hū wū isin kwasị ọgụn-mmèto kwasị nnu*.

Isi Nke Mmèto

Nwa-ebulu Hū Lẹ ndi Nke E

1 E lezi m enya, m nọ hūn Nwa-ebulu hū k'o turu elu Ugu Zayonu—ya lẹ madu nnu ọgụn-mmèsatọ wẹ

* **Isi Nke Mmèto:18** “666” kẹ w'a kpọ a Onu-ebo.

deye efan a le efan Nedi e ezimezi-ihun we. ² M no nuzi olu gha enu-igwee bia. Oluni ri a han ke uzun oken-mirin ri e huni le uzun akpabo hankenmeni. Olu hu m nu rizi ke ebe ndi a kpọ ubo ri a kpọ ubo we. ³ Madu nnu ogun mmesato ahun hu a bu ebu ohun ihun ukpo hu le ihien eno hu ri ndun le ndi-isi hu. O nwonni onye ozo saeka munrun ebu hu wezuka madu nnu ogun-mmesato hu we gha ime uwa gbapuha. ⁴ Ndinu wu ndi hu gileni ikpoho meru enwen we; we wu ikenye marinleni ikpoho. W'e son Nwa-ebulu hu ebe owule o jenkọ. Osolobue le Nwa-ebulu hu a ghaguo ime ihian ile gbari ndini nọke mkpuru-ibuzo. ⁵ Anutuni we ntu onu we; enwon we ntupo.

Ndi Mmon-ozu Eto Hu

⁶ M nozi hun mmon-ozu ozo hun feko ime enu, ime elu-igwee. O gi ozioma itebite hun o k'e zi ndi ile bi elu-uwaa—ya wu, ndi ali owule le ebon owule le ndi a su asusu owule le ndi owule.

⁷ O no gi oken olu si, “Tu ni egun Osolobue, onu e ye e ogho, makeni ogen o k'e gi kin ikpe e ruguo. Eghoe, fe ni Onye hun ke enu-igwee le uwa le ohimin le isi-mirin ri ichen-ichen!”

Babilon' A Daan!

⁸ Mmon-ozu ozo, hun me e ebuo, no fuha, a si, “O danguo! Babilonu uku hu a danguo! Okpoho hu hun me ndi ali ile ra manya a, manya a hun zeni, manya ughere e!”

Afunfun Ri E Che Ndi K'a Narin Ahima Eje-anu Hu

⁹ Mmon-ozu ozo, hun me we eto, no puha, gi oken olu yiko, “Onye owule hun fe eje-anu hu le udi a we kpọ, narin ahima a ezimezi-ihun mobu eka we,

¹⁰ jenkọ d'a razikwọ manya hụ zeni, manya iwe-ḷe-ḷe-ḷe-ḷe-ḷe Osolobue, hụn wẹ gburọḷeni—hụn wẹ huye ime mkpu iwe-ḷe-ḷe-ḷe-ḷe-ḷe a. Wẹ k'e gi ọkụn ḷe nsin-ḷe-ḷe-ḷe-ḷe-ḷe ye wẹ eje-afunfun id'ḷe-ḷe-ḷe-ḷe-ḷe ndi mmọ-ḷe-ḷe-ḷe-ḷe-ḷe ri nsọ ḷe id'ḷe-ḷe-ḷe-ḷe-ḷe Nwa-ebulu hụ. ¹¹ Eḷe-ḷe-ḷe-ḷe-ḷe ọkụn wẹ gi ri e ye wẹ eje-afunfun wẹ k'a ri ime e k'a gha a ḷe-ḷe-ḷe-ḷe-ḷe jẹrin eḷe. Kẹ uhinhin kẹ efinnai, izu-ikẹn arikoni ndi hụ siko d'e fe eje-anu hụ ḷe ihien wẹ kpụ kẹ iya, uwe ḷe onye ọwule narin ahima efan a.”

¹² Onwan cho ndidi eka ndi nsọ, ndi hụn e mesonme ihien Osolobue ku, e kwerikenme ni Jizosi.

¹³ M nọ nọ olu gha elu-igwee si, “De onwan: gha ogenni jenne, ngozi jenkọ d'a rini ndi hụn k'a nọ ime Di-nwoni-ḷe-ḷe-ḷe-ḷe-ḷe!”

“Eghee, ndi wẹ gozi agozi kẹ wẹ wu nke-esi! Wẹ k'e zu ikẹn ọrụn wẹ, makeni ihien wẹ runpuha ri e sọn wẹ!” Iya kẹ Mmọ-nsọ ku.

A Ghorị Wẹ Mkpuru Uwa Mi

¹⁴ Ya m nọ lee enya, m nọ hụn orukpu ọchan. Onye nọdi ali elu orukpu hụ nọ kẹ Nwa nke Ihian. Okpu-eze goru ri a isi. Opi gorini tuni w'a kpọ Siku, hụn wẹ gi a ghọ mkpuru hụ a eka. ¹⁵ Mmọ-ḷe-ḷe-ḷe-ḷe-ḷe ọzọ nọ gha ime Unọ-nsọ puha, gi oken olu hijenni onye hụ nọdi elu orukpu, si a, “Gi nwan siku i ghorị mkpuru, ni ogen e rugu w'e gi ghorị mkpuru, makeni mkpuru uwa mi a kachanringu.” ¹⁶ Ya onye hụ hụn nọdi enu orukpu nọ fe oḷe-siku a ye elu uwa, ghorị mkpuru uwa mi.

¹⁷ Mmọ-ḷe-ḷe-ḷe-ḷe-ḷe ọzọ nọ gha Ulo-nsọ hụn ri elu-igwee fuha, ya nwen gizikwọ oḷe-siku tu-nko. ¹⁸ Ya

Mmẹn-ozì ọzọ nọ gha ukpo nchụ-ẹjan pụha. Ọnwan wụ mmẹn-ozì hụ hụn Osolobue we oku ọwụle gbashiari okun che okpuru ẹ. Ọ nọ weshi olu elu, hijenni mmẹn-ozì hụ gi ọpia-sikụ tū-nkọ, sị a, “Gi nwan ọpia-sikụ i tū-nkọ ghorì ohio-grepu hụn vaini ụwa mi, make ni grepu ẹ a changuọ!”¹⁹ Ya mmẹn-ozì hụ nọ fe ọpia-sikụ a ye elu-ụwa, ghorì grepu ri ụwa, tū a ye ebẹhụ hi-ogbe hụn Osolobue nọ a ghoṣi iwe-le-ọnuma a—ebẹhụ ọ nọ a pinpụha manya grepu ẹ.²⁰ We nọ gha ime obodo hụ pụ, shi ebẹhụ d'a pinpụha manya grepu hụ. Edeke nọ gha ebahun we nọ a pinpụha manya e hupụha. O ru edeke ahun e ru ihian isi-uvun; eshin banye ime ẹ, o ru ẹ ọnu; o d'e huru ihien nọkẹ ma'il' isen kwasị ogun-itenei.

Isi Nke Mmisen

Nsongbu Ikpaẖun Eṣa E D'e Bidon

¹ Ya m nọ hunzi oken ahunlele ọzọ pụ-ichen ime elu-igwee; ọnwan a tūkenmekẹ ẹnya: mmẹn-ozì ẹsa gi eje-afunfun ẹsa! Eje-afunfun ẹsanị wụ ndi ikpaẖun. Uwe kẹ iwe-le-ọnuma Osolobue k'e gi bi.

² M nọ hụn ihien nọ kẹ ohimin ughegbe we gwagbama ya le okun, hunzi ndi hụ meri eje-anu hụ le ihien hụ we kpụ kẹ ya—le ahima nomba hụ hụn a nokin ẹnya ẹfan a. Ndinị we turu mkpenren ohimin ughegbe hụ. We gisonme ubo Osolobue ye we.³ We hụ a bu ẹbu odibo Osolobue wụ Mozizi le ẹbu Nwa-ebulu hụ,

“Euu Chuku Nna,

Onye hụn nwon iken ile!

Ye mekẹ oken ihien le ihien a tū ẹnya!

Euu, Eze anị ile le agbo ile!

Iri-ochan le ezioku ke i gi e me ihien i.

⁴ Euu Nna,
onye k'a si n'o tukọ egun i,
n'o jako efan i mma?

Iyu sọọ ri nsọ.
Alì ile k'a bìa d'e fe i,
makẹni y'a hangụọ enen
hun ghosì n'i ri-ochan.”

⁵ Onwan e meguu, m nọ hun Ulo-nsọ (Odu-
nkwerigbama ahun, Odu Ashia-eri ahun, we nọ e fe
ofufe) hun ri elu-igwee. We gunpu a agunpu. ⁶ Ndi
mmon-ozì esa hu gi eje-afunfun esa hu nọ gha ime
Ulo-nsọ puha. We yisonme ekwa line nwunni, hun
ri e gbukeni. We ile gisonme ihien goru kenhunme
obi we.

⁷ Ime ihien eno hu ri ndun, ohu nọ ye mmon-
ozì esa hu aferẹ esa we gi goru meme. Ihien jun
aferẹ ndi hu wu iwe-le-onuma Osolobue, Onye hu
ri ndun jenin ejen. ⁸ Enwunrun gha ogho Osolobue
le iken e a lofuha nọ jun unọ-nsọ hu; o nwonzini
onye saeka banye Ulo-nsọ hu d'e ru ni eje-afunfun
esa hu mmon-ozì esa hu gi e bi.

Isi Nke Mmisen

Eje-afunfun Esa Ikpazuun!

¹ Ya m nọ nu ke oken olu gha Ulo-nsọ gwa ndi
mmon-ozì esa hu oku, si we, “D'e hu ni iwe-le-
onuma Osolobue ri ime aferẹ esani kpu elu-üwa.”

Ete Hun E Shinni, A Turu!

² Ya mmon-ozì ibuzọ nọ jen d'e hu ihien ri ime
aferẹ a ye enu-üwa, eje-ete hun e shinni, hun a

turuni, nọ jun ndi hụ ẹhụ, ndi ahun bu ahima eje-anu hụ lẹ ndi hụ fee ihien wẹ kpụ kẹ iya.

Ihien Ile Ri Ohimin A Nwunhun!

³ Mmọn-ozì nke ẹbuọ nọ hu ihien ri ime afere a ye ime ohimin, mirin ri ime ohimin nọ ri kẹ edeke onye nwunni. Ihien owule ri ndun ime ohimin nọ nwunhun.

Iyi Lẹ Isi-mirin E Henrin Edeke!

⁴ Mmọn-ozì nke ẹto e hu ihien ri ime afere a ye ime iyi lẹ isi-mirin risonme uwa, wẹ nọ henrin edeke.

Osolobue Ri E Ye Afunfun Furuni!

⁵ M nọ nụ kẹ mmọn-ozì mirin ile ri ẹka a si,
“Euu Onye-nsọ,
onye hun ri kikenni, hun rizikwo mbu.
Ezigbo enen kẹ y'a han!
Y'a hain
i gi e yesonme wẹ afunfun ndini.

⁶ Makeni e gbuguọ wẹ
ndi-nsọ lẹ ndi-amuma,
y'e yeguọ wẹ edeke ra!
Ihien wẹ cho
kẹ wẹ ri nwan a hun!”

⁷ M nọ nụ kẹ ukpo nchu-ẹjan shiarị, si,
“Egheẹ, Osolobue wu Di-nwonni-enyi,
Onye nwon iken ile,
ikpe i ma wẹ hụ mma,
ezigbo enen kẹ y'a han!”

Anwun E D'a Magbu We!

⁸ Mmọn-ozì nke ẹnọ nọ hu ihien ri ime afere a kpu enya-anwun, gi ẹ me anwun ma ihian oda-oda.

⁹ O makenmeke wẹ—kani, hun nke w'e gi gbehuto,

mebehi njo, we nọ kpoma Osolobue hun ri e zihẹ afunfun ndini we iyi. E yeni w'e ogho.

Ishi E Kpume We!

¹⁰ Mmon-ozin nke isen nọ hu ihien ri ime afe a ye ukpo-eze eje-anu hu, ali-eze eje-anu hu nọ gba ishi, we nọ tamade ire we * make oken-ufu we ri ime e; ¹¹ we nọ kpoma Chuku ri elu-igwee iyi make ufu le ete ri we ehụ—egbehutonị we obi mebehi eje-ihien ndi we ri e me.

Iyi Yufretis' A Tahị, Henrin Uwaya!

¹² Mmon-ozin nke isin e hu ihien ri ime afe a ye iyi uku hu wu Yufretisi, mirin e nọ tahị, gi beyeni ndi-nze jenkọ d'a gha azuun owuwa-nya-anwun bia uzọ.

Eje-mmọn Etọ Hun E Dufie Ndi-nze!

¹³ M nọ hun eje-mmọn etọ risonme ke ewo ke we gha onu Dragonu, onu eje-anu hu, le onu onye amuma-ntu hu pula. ¹⁴ Ndinu wu eje-mmọn ndi a runsonme on-atumenya ri ichen-ichen, uwe e jen d'a kpo gbama ndi-nze ile ri uwa make agha we jenkọ d'a lu Uhuohin nke Osolobue, Onye hun nwon iken ile.

¹⁵ (Jesu si, “Lee e! M jenkọ d'a bia idumuzi nọke ohin. Ngozi jenkọ d'a rini onye owule k'a munrun nya, e che, amangbe w'a tonarin a ekwa a, amangbe o gba otọ a ghahunme, a hun we ihien ifenren e”!)

* **Isi Nke Mmisin:10** “tama nkwenren-eze”

16 Eje-mmọn ęto hu nọ kpọkwama ndi-nze, wę ile nọ zu ebęhu w'a kpọ 'Amagidonu. 'Amagidonu ke w'a kpọ a onu Hibru†.

Ali-omahihie Jogbu Enwen E!

17 Mmọn-ozị nke ęsa e hu ihien rị ime afere a ye ime ufere, oken olu nọ gha ukpo-eze hu, ime Ulo-nsọ, si,
“O gugo!”

18 Amuma nọ besonme, mirin nọ densonme, akpabo nọ hansonme, ali nọ mahihie oda-oda. Udi ali omahihieni e metuni kete w'e bimele uwa; o mahihiekenmeke! 19 Obodo uku hu nọ kebe uzọ ęto; obodo shia efọ hun risonme ali ile nọ tikpochanrin. Osolobue a nyanhan Babilon' uku hu, o nọ we mkpu-manya iwe-le-onuma a ye ę ra. 20 Ali ile mirin nohunme e fopu; ahunzikwonị we ugu owule. 21 Eregede ekwan-igwee nyinhan ke ekpa simenti hu a gha elu igwere a dankwasị ihian—d'e ru ni a buma we Osolobue onu make afunfun hun ekwan-igwee hu rị a dannị rị e buhe ni we. Afunfun hu a jokemkeke njọ!

Isi Nke Mmęsa

Oken Igaraja Hu Le Eje-anu Hu

1 Ya mmọn-ozị ohu ime we ęsa hu gi afere nọ bia d'e kunrun m, si m, “Bia, ni m ghosị i ikpe-omuma le afunfun jenko d'a rinị oken igbaraja hu hun nodi ali enu iyi bu oda; 2 oken igbaraja hu ya le ndi-nze uwa wi me mgba, hun mgba a we me tugbariguu ndi bi elu-uwaleke manya.” 3 Ya mmọn-ozị hu nọ buru m

† **Isi Nke Mmisin:16** I kpochanrin a, “Ha-magidonu” ro, hun wu “Ugu Magidon”.

ime mmṣon shi ime atụ, m nọ hụn okpoho nọdị anị elu eje-anụ e nwun ufie-ufie. Wẹ dejun eje-anụ hụ ẹfan ichen-ichen hụn e kutọ Osolobue ẹhụ. Isi ẹsa lẹ mpin iri kẹ eje-anụ hụ nwe.

⁴ Okpoho hụ yi ẹwuru nanran oḍa-oḍa hụn e nwun ufie-rọnị, ufie-rọnị lẹ ufie-ufie. O yi ihien-mma rị ichen-ichen: kẹ goru kẹ ejije lẹ ihien-mma ndi ozo—kẹ ihien mma wẹ gi omuma hụn a kọnị mmeṣe. O gizi mkpu wẹ gi goru mmeṣe ẹka. Ihien rụnị lẹ ihien ru unyin ya lẹ igbaraja wị jun mkpu hụ. ⁵ O nwe ẹfan wẹ de ye ezimezi-ihun ẹ. Alị ẹfan ahun e mike. Ẹfan hụ wụ:

“Babilon' Uku, Nne Ndi-igbaraja Lẹ Ihien Ile Rụnị Rị Ime Uwa.”

⁶ M nọ hụn a nị ẹdeke okpoho hụ ra, ẹdeke ndi-nso lẹ ndi wẹ gbu make ẹri wẹ shia nị Jizosị, rị a tū a kẹ manya.

Ogẹn m gi hụn a, ọ tūkenme m ẹnya!

⁷ Kanị, mmṣon-ozì hụ nọ sị m, “K'ọ rị a tūnị i ẹnya? M k'a kowa nị ihien okpohoni lẹ eje-anụ isi ẹsa lẹ mpin iri hụ bu n'ẹ wụ.

⁸ Eje-anụ hụ i hụn te rị arị mbụ, bụ ọ rizi a nwan—kanị, o d'a gha ime eje-mgbugbu hụ migbu enwen ẹ pūha. Ọ pūhagụ, o k'a la ntikpo. Mgbe ndi hodu enu-ṳwa—ndi ahun ile wẹ deyeleni ẹfan wẹ ime ẹhuhọ nke ndun nị Osolobue d'e gbe iyetọ ṳwa—k'e gi hụn kẹ eje-anụ hụ pūhazi, o k'a tū wẹ ẹnya, makeni o te rị arị, bụ ọ rizi a nwan, kanị ọ lalazi alala.

⁹ Onwan cho amamihiẹn lẹ nghota.

Isi ẹsa hụ wụ ugu ẹsa okpoho hụ nọdị elu wẹ; wẹ wuzikwo ndi-nze ẹsa. ¹⁰ Ime ndi-nze ẹsa hụ, isen a

danguo; ohu ri nwan a ki; ozo ri n'a e ke bia. Kani, o bia, o k'a tohu ekere suo.

¹¹ O me nke eje-anu hu hun ri mbu bu o rizi a nwan, iya wu eze hun k'e me we ndi-nze esato, bu onye ohu ime we esa ro—make ni o k'a kizi. Kani, ogen o k'e gi fuhazi, o k'a lazikwo ntikpo.

¹² Mpin iri hu i hun wu ndi-nze iri hun we keleni kin eze. Kani we k'e kin we eze, a ki we ekere suo, mgbahunme okuloku ohu, uwe le eje-anu hu.

¹³ Ihiyen ohu ke we iri bu obi—we iri k'e kwerigbama, we okiki we ye eje-anu hu n'o kima. ¹⁴ We k'a lusun Nwa-ebulu hu agha, kani, Nwa-ebulu hu k'e meri we, make ni iya wu Nna ndi-nna le Eze ndi-nze, make ni ndi ya le we wi wuzikwo ndi *Chuku* kpọ, ndi o hori ahori, ndi we gi e don enya.”

¹⁵ Mmon-ozu hu nozi si m, “Miri ndi hu i hun, hun igbaraja hu nodi ali elu we wu ndi ri ichen-ichen, igunrun ihian ri ichen-ichen, ali ri ichen-ichen le asusu ri ichen-ichen.”

¹⁶ “Nke mpin iri hu i hun, ize igbaraja hu k'a ban uwe le eje-anu hu; we k'e ti e iwi—napuchanrin a ihien owule—gbari a oto, ripu uru-eha a, kpọ a okun. ¹⁷ Make ni, Osolobue e buguo ihien o cho n'o me che we ime obi, keni we me e, ghahani ikwerigbama wechanrin ani-eze we le okiki we ye eje-anu kima, d'e ru ogen oku Osolobue e gi mezuchanrin.”

¹⁸ “Nke Okpoho hu i hun, iya wu obodo uku hu hun a kichanrin ndi-nze ri uwa.”

Isi Nke Mmesato

Babilon' A Daan!

¹ Onwan e meguu, m no hun mmon-ozì ozo k'ò gha elu-igwee hidanla. Mmon-ozì hu nwon ikèn o gi e me ihien bu oda; o banhan, uwa ile no nwun make ogho ri a ehụ hun ri e ti ke ukpe. ² O no gi oken olu si,

“O danguo! Babilonu uku a danguo! O wuruole ebe eje-mmon ri ichen-ichen bi; ebe mmon owule runi bi; ebe nnunu owule runi bi; [ebe anu owule runi, hun e ze ize bi]. ³ Make ni, ndi ani ile a raole manya a; o tugbuguo we—manya a hun wu ughere le ihien-olila-enya. Ndi-nze ri uwa e meguo mgba a. Ndi-afia uwa e giguu aku-le-uba a gha obibi ehụ-ufu le eje-obibi e henrinsonme ndi-idafin.”

⁴ Ya m no nu ke olu ozo gha elu-igwee si,

“Ndi nke m, gha ni ime e puha, amamgbe unu e bu eka che ime njo a, amamgbe unu e son e narin afunfun rini n'a; ⁵ make ni, enumenu njo a e ruguo enu-igwee; Osolobue a nyanhanguo njo a.”

⁶ “Me e ihien o me ndi-ozo! Megwari a ya uzo ebuo! Gbaye e manya k'o don gbaye ndi ozo—y'a gbayed e ya uzo ebuo! ⁷ Ye e afunfun le ekwan hun han ke ogho o ye enwen e le obibi ehụ-ufu o bi.

Ebe o me ni o si enwen e, 'Mme ri a ki, mme wu eze-okpoho; di anwunnahinni m, ihien-ekwan emeko m!' ⁸ Ya wu, afunfun ile rini n'a k'e gi enya-anwun akp'ohin ohu biachanrin—ke onwun, ke ihien-ekwan, ke unwun. We k'a kpo a okun. Egh ee, make ni Chuku-Nna, hun ri a ma a ikpe wu diken.”

⁹ Ndi-nze ri uwa hun meguu mgba a, son e bi obibi ehụ-ufu, k'a kwan n'a ekwan, gon'e—ogen w'e gi hun enwunrun okun we kpo a. ¹⁰ Egun afunfun o ri ime e aniko we nokunme e. We k'e turu ebe teni, a si, “Lee o! Lee o!

Lede obodo uku hụ-o!
 Obodo uku wụ Babilonu!
 Afunfun wẹ ye e e gi ekere ogen sọ,
 mgbahunme okuloku ohu,
 biachanrin!”

¹¹ Ndi-afia uwa k'a gha a kwan n'a ekwan, sukuru, makeni o nwonzini onye e nonnarin wẹ ibu-afia wẹ— ¹² goru, ola (siva), ejije le ihien-mma ndi ozo le omuma ndi akoni w'a cho a cho wẹ gizi a cho ihien mma; ekwa line, ekwa popu nanranni, ekwa Siki le ekwa ufi; udi osisi ile e shin ohunma le ihien ile ri ichen-ichen wẹ gi aivri wu eze-enyi mememe; udi ihien owule wẹ gi osisi sitron hun a nanranni le igwe bronzu le igwe mmaka le mabulu mememe; ¹³ sinamonu le ihien ndi ozo ihien-oriri gi a sọ; nsensi le maa le Frankisensi; manya, ude-olivu, oka wẹ gwe nanranni le oka-witi; efin, atunrun, eshin le ugbo-anyinyan; igbon le ume-ndun ihian.

¹⁴ Ndi-afia hụ k'a si a,

“Thien ile ri mma ri a nagbu i enya a nahinguo i!
 Ihien ile ehugie fu ile ogho i ile e hunahinguo i! Y'a hunkozi wẹ jenin ejen!”

¹⁵ Ndi hun a zu afia ihien ndini, hun gi afia uwe le ya a zu hi odafin k'e turu ebe teni a kwan ekwan —egun afunfun o ri ime e aniko wẹ nokunme e—wẹ k'a kwan ekwan, e goo, a si,

¹⁶ “Lee o! Lee o! Lee obodo uku hụ, hun yi ekwa line nanranni le ekwa popu nanranni le ekwa ufi, hun yi ihien-mma nanranni jun ehugie—ke goru ke ejije le ihien mma ndi ozo wẹ gi omuma a koni mememe!
¹⁷ Aku-le-uba hụ ile e gigu nwan ekere ogen sọ, mgbahunme okuloku ohu, lachanrin iwi!”

Ndi-isi ụgbọ-mirin ile ịe ndi ile e gi ụgbọ-mirin e jẹn ịe ndi a rụn ime ụgbọ-mirin ịe ndi owule e gi ụgbọ-mirin a zu afia, no turu ebe teni, ¹⁸ e yi oro—ogẹn we gi hun enwunrun we gi kpo a okun—a si,

“Elee obodo no ke obodo ukuni?”

¹⁹ A buo we uzunzun ye isi, a kwan, e goo—a si,
“Lee-o! Lee-o! Ledo Obodo uku hu ndi ile nwon ụgbọ-mirin ime ohimin gi aku-ịe-uba a hi odafin! E gi we nwan ekere ogẹn, mgbahunme okuloku ohu, tikpofu a!”

²⁰ Euu elu-igwee, ghoghoma n'o danguo! Unu ndi-nsọ ịe ndi-ozu pu-ichen ịe ndi-amuma, ghoghoma ni n'o danguo! Makeni, Osolobue e giguo ufiri onu ma a ikpe!

²¹ Ya mmọn-ozu ohu kin-akwanran oda-oda no buru olo hi-ogbe, tu a ye ime ohimin, si,

“Enina ke we jenkọ d'e gi gi eka-iken tu obodo uku hu wu Babilonu ye ali; ahunkozi w'a!”

²² “Anukozi we olu ndi-ubo ịe olu ndi oku-ebu ịe oku-ekpiri ịe oku-opi ime i;

ahunkozi we onye orun-nka owule ime i;

anukozi we ukwere olo ime i;

²³ ukpe-eka enwunkozi ime i;

anukozi we olu ighoghọ ndi ri a gba ehuhuo ime i.

Onwan k'e me makeni ndi-afia i gi ndi-uku uwa we wu wiwi ihien, o k'e me makeni y'e giguo eje-iken i me ndi ali ile ke i me we, dufiechanrin we.

²⁴ Eka a ke we nozi hun edeke ndi-amuma ịe ndi-nsọ ịe ndi ile we gbu ime uwa.”

Isi Nke Mmitenei

A Ghoghoma We Elu-igwee

¹ Onwan e meguu, m no nu oken uzun ime elu-igwee, hun no ke olu igunrun hi-ogbe; we hu a si, “Ija-mma ya rini Osolobue! Nzuopuha le ogho le iken wu nke Osolobue enyi!— ² make ni ezioku k’o gi a han enen; o han ezigbo enen. O maguo oken igbaraja hu ikpe, igbaraja hu gi ughere e meru uwa. Osolobue e yeguo a afunfun make edeke ndi idibo Osolobue o gbu, gi megwari a ihien o me we.” ³ We no siji, “Ija-mma ya rini Osolobue! Enwunrun okun we kpo igbaraja ahun hu a loshi enu jennin ejen!”

⁴ Ndi-isi eno kwasi ogun hu le ihien eno hu ri ndun no dan ali, fe Osolobue hun nodi ani elu ukpo-eze hu, si, “Isee! Ja ni Osolobue mma (Aliluya*.)”

Oriri-agbamehuhuo Nwa-ebulu Hu

⁵ Olu no gha ukpo hu si, “Ja ni Chuku enyi mma, unu ndi idibo e le ndi ile a tu egun e—ke ndi uku ke ndi nta!”

⁶ Ya m no nu oken olu hun no ke olu igunrun hi-ogbe mobu oken mirin ri e huni le oken akpabo. Olu hu ri a si,

“Ija-mma ya ri ni Osolobue—

Aliluya! Make ni Di-nwonna-enyi wu Osolobue enyi, onye hun nwe iken ile, ri a ki!

⁷ Ni enyi ghoghoma ni, ni enyi nanma ni; ni enyi yeme e ogho, make ni agbamehuhuo Nwa-ebulu hu e ruguo; nwa-agbo o k’a lu a kwademegu enwen e.

* **Isi Nke Mmitenei:4** “Aliluya” wuzi “Ja ni Osolobue mma!”

⁸ A niguṣo wẹ nwa-agboṣo hu yiri ẹkwa line n̄anranni, h̄un ri e gbukeni, h̄un nw̄onl̄eni nkaru” — makeṇi ẹkwa line hu ri a ghoṣi ọrun ọma ndi nke Osolobue run.

⁹ Mm̄on-oz̄i hu n̄o si m detu ọnwan: “Ngozi a rikakwo ni ndi hu wẹ kp̄o oriri ag-bamehuhuo Nwa-ebulu hu.”

O nozi si m, “Ihienni wu oku Osolobue nke-esi.”

¹⁰ Ya m n̄o dan ali uku a, ken̄i m fe e, kan̄i o n̄o si m, “Emekwole a! M wuh̄u odibo rike yu le umune i ndi kw̄ond̄on oku Jesu. Fee Osolobue! Makeṇi, ihienn̄ Jesu ku, iya wu ali ihienn̄ ile ndi-amuma ku.”

Onye H̄un Nyinko Eshin Ochan

¹¹ Ya m n̄o h̄un ke elu-igwee kpupu, a h̄un m eshin ochan eb̄ehu; efan onye ri e nyinn'e wu “Onye-w̄e-gi-d̄on-̄nya le Ezioku.”

O han en̄en zinrinni, a lu agha zinrinni.

¹² Enya a hu e nwun ke ire-okun. Okpu-eze bu oda ri a isi. O nw̄onzikwo efan wẹ de ede h̄un o me ni o nw̄onni onye mar̄in n'a wezuka ya le enwen e. ¹³ O yi ewuru wẹ yoye ime edeke. Efan wẹ gi mar̄in a wu Oku Osolobue. ¹⁴ Ndi-agma enu-igwee ile nyinko eshin ochan sonko a. Ewuru wẹ wu ezigbo line ochan, h̄un nw̄onl̄eni nkaru. ¹⁵ Opīa-agma tuni gha a onu suepuha, h̄un o jenk̄o d'e gi meri ndi ali ile. O jenk̄o d'e gi okpo-igwe ki wẹ. O k'a zokpukpo wẹ ke ihian don a zo akpuru vaini: eb̄ehu Onye ahun nw̄on iken ile wu Osolobue n̄o a ghoṣi oken iwe-le-onuma-a k'o k'a n̄o zo wẹ. ¹⁶ Nzere wẹ deye elu ewuru e le ogbodogbo a wu

“Eze ndi-nze le Nna ndi-nna.”

Jizosi E Meri Eje-anu Hu Le Onye Amuma-ntu Hu

¹⁷ Ya m nọ hụn mmon-ozì ohu k'ò turu ẹn̄ya-anwun, ọ nọ gi oken olu kpọ nnunụ ile e fe elu-igwere oku, sị wẹ, “Bia nị-o! Gbakikome ni d'e ri oriri uku Osolobue kpọ-o! ¹⁸ D'e ri ni anụ ndi-nze le ndi-ndu-agma uku le ndi-uku; anụ eshin le ndi te ri e nyinni wẹ; anụ ihian ile—ke ndi nwon enwen wẹ-o ke igbon-o; ke ndi uku-o ke ndi nta-o!”

¹⁹ M nọ nwan hụn eje-anụ hụ le ndi-nze uwa le ndi-agma wẹ ebe wẹ gbakikome ni wẹ d'a lusun onye hụn ri e nyin eshin hụ le ndi-agma a ogun.

²⁰ Kani wẹ nọ nwundon eje-anụ hụ, ya le onye amuma-ntu ahun te ri a rundon ni eje-anụ hụ orun-atumenya—hun gi orun-atumenya ndi hụ dufie ndi hun narin ahima eje-anụ hụ le ndi hun fe ihien wẹ gi udi a kpụ. Wẹ nọ tu wẹ ebuo ebe wẹ ri ndun ye ime omi ahun okun ri, hun okun a gi nsin-ẹn̄ya-anwun a dun. ²¹ Wẹ nọ gi opia-agma onye hụn ri e nyin eshin ochan gbupu ndi hoduni—opia-agma hụ gha onu a apuha; nnunụ ile nọ gi anụ wẹ rijunchanrin efo, righafe oken.

Isi Nke Ogun

Ahụa Ogun-iri Kwasi Nnunaị Hụ

¹ Ya m nọ hụn mmon-ozì ohu k'ò gha elu-igwee hidanla, ọ gi ishanhan eje-mgbugbu hụ migbu enwen e le egan hi-ogbe. ² Ọ nọ nwundon dragonu hụ, agwo mbu-mbu hụ wu Ekwensu, hun wuzikwo Setani, ken e egbun jenko d'a to ahua ogun-iri kwasi nnunaị, hun wu ahua nnu-uku; ³ ọ nọ tu a ye ime eje-mgbugbu hụ migbu enwen e, kpokin eje-mgbugbu hụ, fidon e—amamgbe o dufiezi ndi ani ri ichen-ichen. Wẹ k'e donme e ebenu d'e ru ni ahua

ogun-iri kwasị nnunai hụ e zu. Ohun meguu, we k'a hatuziriri a ekerere ogen.

⁴ Ya m no hunsonme ukpo-eze; we no tume ndi hun nodisonme ani enu we ndi k'a han enen. M no hunzikwo ume-ndun ndi hụ we gi ifiri eri we shia ni Jizosi le ifiri oku Osolobue befụ isi. Ndinị ju ni efeko we eje-anu hụ mọbu ihien hụ we gi udi a kpu, juzi ni anarinko we ahima eje-anu hụ ezimezi-ihun we mọbu eka we. We no nwan gha onwun lihi, rizi ndun, son Kraisti ki ahua ogun-iri kwasị nnunai hụ, ahua nnu-uku. ⁵ (Ndi ozọ nwunni aghani onwun lihi d'e ru mgbe ahua ogun-iri kwasị nnunai ahun gi zuguu.) Onwan wu igha-onwun-lihi nke ibuzo.

⁶ Onye we gozi agozi le onye ri nsọ ke onye owule k'a ri ndi k'a gha onwun lihi nke ibuzoni wu. Onwun nke ebuo enwon iken ebe ndini ri—anwunko we onwun nke ebuo. Kama, we k'a wu ndi nchu-egan Osolobue le Kraisti. We k'e son Kraisti ki ahua ogun-iri kwasị nnunai.

Nke Ekwensu A Guu!

⁷ Ahua ogun-iri kwasị nnunai hụ zuguu, a topu we Ekwensu, gha ime ngan o ri wepuha a. ⁸ O k'a pu d'e dufie ani ndi risonme ebamin-enọ uwa, Gogu le Magogu ke w'a kpo we. O k'e wegbama we d'a lu agha. E bukenmeka we oda: we no ke ejan ri ohimin. ⁹ We no ghakwori ebe we ri fetu ali ichen-ichen ri elu-uwa* bia d'e fihunme ebe ahun ndi nke Osolobue ri (ago we) le obodo ahun ri Osolobue obi; kani, okun no gha enu-igwee hidan, bu we ile ri.

* **Isi Nke Ogun:9** ledela Habakoku 1.6

¹⁰ Wẹ nọ tū Ekwensu hụn dufieni wẹ ye ọmị ọkụn lẹ nsin-ẹnya-anwun hụ—ebehụ eje-anụ hụ lẹ onye amuma-ntu hụ ri. Wẹ k'e ye wẹ afunfun uhinhin lẹ efinnai jennin ejen.

Okinkin-ikpe Ikpaunun

¹¹ Ya m nọ hụn ukpo ọchan ohu hi-ogbe lẹ onye hụn nọdị alị elu ẹ. Uwa lẹ elu-igwere nọ gha ebe ọ ri gbafu, o nwonzini ebe wẹ k'a nọdị. ¹² M nọ hụn ndi nwunni kẹ wẹ turu ihun ukpo-eze hụ—kẹ ndi-uku kẹ ndi-nta. E kpupusonme wẹ ehuhuo bu ọda; ya wẹ nọzi kpupu ehuhuo ọzọ, hụn wu ekukwo nke ndun. Wẹ nọ gi ihien onye-onye me kin ndi hụn nwunni ikpe—kẹ wẹ don detosonme wẹ ime ehuhuo ndi hụ.

¹³ Ohimin nọ wepuha ndi-nwunni ri ime ẹ, Onwun lẹ Ali-mmọn nọ wepuhazikwo ndi-nwunni ri ime wẹ. Wẹ nọ gi ihien onye-onye me kin ẹ ikpe.

¹⁴ Ya wẹ nọ tū Onwun lẹ Ali-mmọn ye ime ọmị-ọkụn hụ.

Ọmị ọkunnị wu onwun nke ebuo. ¹⁵ Onye ọwule wẹ hunleni efan a ime ekukwo nke ndun, a tū wẹ onye hụ ye ime ọmị-ọkụn hụ.

Isi Nke Ohu-kwasi-ogun

Elu-igwee Ohun Lẹ Elu-ụwa Ohun

¹ Ya m nọ hụn elu-igwee ohun lẹ enu-ụwa ohun, makeni elu-igwee ibuzo lẹ elu-ụwa ibuzo a laguo. Ohimin arizi a.

Jerusalem' Ohun

² M nọ hụn obodo-nsọ hụ, Jerusalem' ohun hụ, k'ọ gha enu-igwee hidanla, Osolobue zihẹ ẹ. Ọ ri

ke nwa-agbọọ wẹ chọguu mma, hụn rị e che di e.
3 M nọ nụ oken olu gha ebe ukpo-eze hụ rị a sị,

“Lee e, ebe-obibi Osolobue a biaguọ ime igunrun ihian; o k'e bi ime igunrun wẹ. Wẹ k'e fee e nị uwe wu ndi nke e; [Osolobue k'e me wẹ nị ya wu Osolobue wẹ]—Osolobue le enwen e k'a noyeni wẹ.

4 O k'e finchanpuchanrin wẹ enya-mirin owule rị wẹ enya. Onwun arikozi; ke ihien enya-mirin ke ekwan ke ufu arikozi—makeni ihien akan a ghafeguọ.”

5 Onye hụ nodi ani elu ukpo-eze hụ nọ sị,

“Lee e! M rị e kedonzi ihien ile!”

O nọ sịzi, “Detu ihienni, makeni oku ndini wu ezioku le oku furu wẹ gi e don enya.”

6 Ya o nọ sị m, “O meguo! Mme wu Ibuzo le Ikpazuun, Mbidon le Ogugu. Onye owule egun-mirin rị a gun, m k'a gha isi-mirin hụ mirin e ye ndun gha e hupuha ye e mirin ofe. 7 Ndi hun merini k'e nwenen ihien ndini m k'e ye. M k'a wuru Osolobue wẹ, a wuru wẹ umu m.

8 Kani, nke ndi a tu egun le ndi-kwerileni le ndi runi; ndi-izighe le ndi-ughere; ndi ile e bu-nshin le ndi gi iken eje-mmọn a run; ndi a ruu mmọn le ndi-ntu ile—wẹ ile shiko d'a rị ime omi okun le nsin-enya-anwun hụ, hun wu onwun nke ebuo.”

Jerusalem Ohun Hu

9 Ya mmọn-ozu ohu ime wẹ esa hụ te bu afere afunfun ikpazuun esa nọ bia d'a sị m, “Bia, m k'a ghosi i onye hụ ya le Nwa-ebulu hụ jenko d'a gba ehuhuo, nwunye Nwa-ebulu hụ.” 10 O nọ buru m ime-mmọn shi enu ugu ohu, oken-ugu, hun jen elu oda-oda; o nọ ghosi m obodonso hụ wu Jerusalem k'o gha elu-igwee hidanla,

Osolobue zihę ę. ¹¹ Ogho Osolobue ri a ehụ, o hụ e be nwanran-nwanran ke ihien-mma ndi ahun a kokenmeni, leke akpuru Jaspas; o hụ e nwun zai. ¹² Mgbon ę hi-ogbe, jen elu oda-oda. Onu-mgbon mmebuo k'o nwe; mmon-ozu ohu-ohu turusonme onu-mgbon ndi hu. We deye efan ikpunulo mmebuo ri Izrelu ohu-ohu onu-mgbon ndi hu. ¹³ Onu-mgbon eto-eto risonme ę ebamin eno—eto ri ibeka owuwa-nya-anwun, eto ri ibeka ugu, eto ri ibeka ndidan-mirin, eto ri ibeka ndidan nya-anwun. ¹⁴ Mgbon anı hu nwon omuma mmebuo gin'e noke iyeto. We deyesonme efan ndi-ozu puchen mmebuo Nwa-ebulu hu enu we.

¹⁵ Mmon-ozu hu gwa m oku gi mkpinsin goru we gi a ma ihien, hun o k'e gi ma obodo hu le onu-mgbon ndi rin'a le mgbon ę. ¹⁶ Obodo hu nwe azuun eno. Azuun eno ahun wuchanrin ahanmahan—ya wu, k'o suehan k'o shıahan.

O no gi mkpinsin a ma obodo hu. *stadion* nnu-uku mmebuo ro (ya wu ihien noke maili ogun-mmitenei kwası nnu-eto). K'o suehan le k'o shıahan le k'o jehan elu wuchanrin ahanmahan. ¹⁷ O nozi ma ke mgbon ę shıahan: gha mkpo-eka d'e ru onunu-eka mmebuo-uzo-mmebuo (kubiti eno kwası ogun-esa) k'o wu—ke ihian don a ma ihien. Ihien mmon-ozu hu gi ma a hanhu ke hun ihian gi a ma ihien.

¹⁸ Omuma a koni w'a kpo Jaspas ke we gi tun mgbon hu; goru we gwagbamalenı ya le ihien owule ke we gi tun obodo hu; o nwun zai ke ughegbe.

¹⁹ We gi udi ihien-mma ile ri ichen-ichen ri mkpas chosonme omuma ndi hu gi mgbon hu noke iyeto

mma. Nke ibuzo wu Jaspā; hūn mē ē ebuo wu Safe; hūn mē wē eto wu ageti. Hūn mē wē eno wu emaradi; ²⁰ hūn mē wē isen wu onisi; hūn mē wē isin wu kaneliani. Hūn mē wē esa wu kraisolaiti; hūn mē wē esato wu berilu; hūn mē wē itenei wu topazi. Hūn mē wē iri wu kraısopresi; hūn mē wē mmanai wu jasinti; hūn mē wē mmebuo wu ametisi. ²¹ Omuma pu-ichen a koni hūn wē gi tusonme onu-mgbon mmebuo hu risonme udi ichen-ichen. Onu-mgbon owule ime wē wu ogbe omuma pu-ichen ohu—omuma ndi hu w'a cho acho wē gi a cho ihien mma. Goru wē gwaleni ke wē gi memē uzọ uwaya-kani hūn ri ime obodo hu: o nwunchanrin zai ke ughegbe!

²² Ahunni m unon-nsọ owule ime obodo hu—makeni Osolobue hūn wu Di-nwonni-enyi, Onye hūn nwon iken ile, le Nwa-ebulu hu wu Ulo-nsọ obodo hu. ²³ Obodo hu achodeni enya-anwun mobu ifon hūn k'e ye e ukpe, makeni ogho Osolobue wu ukpe e, Nwa-ebulu hu wu ukpe-eka a.

²⁴ Ukpe obodo hu ke ndi ani ichen-ichen k'e gi bi. Ndi-nze uwa k'e webanhan ogho wē ime Obodo hu.

²⁵ Agunmakọ wē onu-mgbon obodo hu ebe eki ri elu, bu uhinhin ariko ebegu. Ya wu, agunmakọ w'a ke uhuhin han.

²⁶ Wē k'e webanhan ogho ali ichen-ichen le aku-le-uba wē ime e. ²⁷ Kani, o nwonni ihien owule rileni ochan mobu onye owule hūn e mē ihien runi enya Osolobue mobu ihien owule ya le ntu wi k'a banyen'e. Ndi wē de efan wē ime ekukwo nke ndun Nwa-ebulu hu, uwe sọ k'a banye e.

Isi Nke Èbuò-kwasì-ògùn

Iyi Hụ Hụn Mirin E E Ye Ndun

¹ Mmọ̀n-ozì hụ nọ ghosì m iyi ahun mirin e e ye ndun; ọ gha ukpo Osolobue le Nwa-ebulu hụ hula; o nwun zai ke ughegbe. ² O hukọ ahanmahan uzọ uwaya-kani ri ime obodo hụ. Osi ahun hun e ye ndun risonme iyi hụ azunni le azunni. Osi hụ a mi udi mkpuru mmebuo ahua. Ifon-ifon ke o gi a mi mkpuru. We gi ehuhuo a a zuo ndi ani ile oia.

³ Ahunkozi we ihien we bu onu. Kama, ukpo-eze Osolobue le Nwa-ebulu hụ k'a ri ime e, ndi-idibo e k'a ri e fe e. ⁴ We k'a gha a hun ihun e; efan a k'a ri we ezimezi-ihun. ⁵ Ohii agbakozì; achokozì we ukpe-eka mobu ukpe enya-anwun w'e gi legha uzọ, makeni Osolobue hun wu Di-nwonni-enyi jenkọ d'a wu ukpe we. We k'a ki jenin ejen.

Obibia Jesu

⁶ Mmọ̀n-ozì hụ nọ si m, “Oku ndini wu ezioku, we furu w'e gi don enya—makeni Onye-nwonni-enyi, Chuku hun a gwa mmọ̀n ri ime ndi-amuma ihien hụ ndi-amuma e ku, iya zihę nwan mmọ̀n-ozì e d'a ghosì ndi-idibo e ihien ndi hun o meni we k'e meriri egwa.”

⁷ Jesu si,
“Lee e, m lala egwa!
Ngozì rini onye k'e me
ihien amuma ri ime ehuhoni ku!”

⁸ Mme wu Jonu, mme gi ntin m nu ihien ndini, gi enya hun we. Ogen m gi nuguu we, hunguu we, m nọ dannì mmọ̀n-ozì hụ ghosì ni m we ali—ni m fe e.

⁹ Kani o si m, “Emekwole a! M wu odibo ibe i—iyu

lẹ umunẹ i ndi-amuma lẹ ndi hun e mesonme ihien ndi hu ehuhuoni ku. Fee Osolobue!”

¹⁰ O nozi si m, “Ezumele ihien ndi we ku ime amuma ri ehuhuoni, makeni, ogen we k'e gi me ri nsue. ¹¹ Onye e me njo ya mesonme; onye e bi obibi ru unyin ya bisonme; onye ri ochan ya risonme; onye ri nsọ ya risonme.”

¹² Jesu si, “Gon ni ntin, m lala egwa! Ugwo-orun m jenko a ku ri m aka. M k'a ku onye owule ugwo k'o don run. ¹³ Mme wu Afa lẹ Omega, Ibuzo lẹ Ikpazuun, Mbidon lẹ Ogugu.”

¹⁴ Ngozi rini ndi hu k'a su ekwa we, keni we ni we d'e ri mkpuru osisi ahun e ye ndun, keni we ni we gha onu-mgbon hu banye ime obodo hu. ¹⁵ Makeni, ndi hu e bi ke nkite, ndi a rua-mmọn, ndi e bu nshi lẹ ndi gi iken eje-mmọn a run, ndi-ughere, ndi-izighe, ndi a rua mmọn lẹ onye owule ntu a suo lẹ onye owule e me ihien ya lẹ ntu wi abanyeko obodo hu.

¹⁶ “Mme wu Jesu zi mmọn-ozini m ozini d'e zi unu, keni o rusonme uka ichen-ichen aka. Mme wu mkpogun ahun Defidi gha suepuha; m ghazikwo ehụ Defidi puha. Mme wu kokise utuntun hu hun e keni.”

¹⁷ Mmọn-nsọ lẹ okpoho hu 'ya lẹ Jesu jenko d'a gba ehuhuo ri a si,

“Bia!”

Onye owule hun nuni ya siji,

“Bia!”

Onye owule egun-mirin ri a gun ya bia! Onye owule choni, ya weri mirin hun e ye ndun, ya weri e ofe ra.

Eka-ntin!

¹⁸ M rị a gwakwo onye owule nu ihien ndi we ku ime amuma ri ekukwoni ni onye owule becheni ni we, Osolobue k'e beche n'e afunfun ndi hu we ku oku we ime ehuhuni; ¹⁹ onye owule wepu ihien ime we, Osolobue k'e wefu ihien run'e ime osisi hu e ye ndun le obodo-nsọ hu we kusonme oku we ime ehuhuni.

Mmekin

²⁰ Onye hun ku ihien ndini, hun gi we shia eri, si,
“Egheę, m lala egwa!”

Isee! Onye-nwonna-enyi wu Jesu, bia!

²¹ Efo ma Onye-nwonna-enyi wu Jesu ya rini ihian ile.

**Elu Ọhụn: Ekwkwọ-Nsọ (Azụn Ọhụn rịn'a)
Revision of New Testament in Ika**

copyright © 2010 Wycliffe

Language: Ika

Translation by: Wycliffe

Ika (ikk) Nigeria

In Nigeria the word Ika is not only the name of the Ika people, but is also used to designate a local government area in the Akwa Ibom State. The Ika people are a sub group of the Igbo people. It is interesting to note that Ika is the name of a town in Croatia is one of the eight Annang local government areas of the local government areas in Akwa Ibom State. An alternative name for the Ika people is Ika-Annang. There appears to be another dialect of Ika that is spoken in Delta State of Nigeria.

Copyright Information

© 2010, Wycliffe. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789037056

Revision

The New Testament

in Ika

© 2010, Wycliffe. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 21 Feb 2024 from source files dated 29 Jan 2022

31b0248e-272a-5dee-8226-bcc00c54d9b1